

## Yaubada a wogeletana

<sup>1</sup> Buka geke uyahina Yaubada noyana i wogeleteya Yesu Keliso uyahina po ipa Yesu a tu bagibagi tauta ina wiatatiyeta po ta hanapugeya houga kikina ma apo awai hina geleta yaka Yesu a tu winoyanoya i himiliyai tau a tu bagibagi Yoni uyahiu po ipa a wipaliweleneya.

<sup>2</sup> Tau Yoni ginouli geke atapuhi amaka a galehi yaka a palipaliwelemi Yaubada a baha po Yesu Keliso tuwegana.

<sup>3</sup> Ona kaoha tu'mhiyawa po tu lunonola ipa geke bahapiko gilugilumana ona wotagoya babana houga amaka i tuliyaliyata.

### *Wimaamala bolu magouhi 7 uyahihi*

<sup>4-5</sup> Tau Yoni, omi pepa a gilumiyahi tu witumagana bolu magoumi 7 Asiya u hinena o memae.

Yaubada odubo walihaga uyahinei i nei po amalai, po houga he nenei uyahihi e memae, ma Alugona tupo magouhi 7 tauhi Yaubada anani mae wasawasana u naona he towotowolo ma Yesu Keliso tauna tu limoina dumana tauna hilage uyahinei i towolo tahaya po hipuli wasawasahi hai Guyau. Hai tonuga gegekahi hai lunugotootogo ma nugodumola uyahimi.

Yesu Keliso tauna i lunugotootogogeta po talanei ata apapoe i oga halehi,

<sup>6</sup> po uyahinei i wiwawalita po tauta a tu wasawasa po a tu witalaguyaba Yaubada Amata uyahina. Yaka Yesu ta wootalagiyeya babana a wasawasa po a kadidili memewahagana. Moina.

<sup>7</sup> Ona galeyā, apo yohola yaloigei ina hopu mai  
 po lawa magomagouta matatiyei ta galeyā  
 ma tu wihiniwiyuwana apo gasi hina galeyā  
 ma tu mehipuli tupo atapuhi uyahihi he  
 memae apo hina nugodubu po u matana  
 hina tou bahabaha.  
 Naka moina apo ina geleta.

<sup>8</sup> Guyau Yaubada a baha i pa, ‘Tau tu kadidili  
 dumana, tau ani wawala po ani kokoe. Houga  
 odubona po amalai po houga he nenei uyahihi a  
 memae.’

### *Keliso galenana*

<sup>9</sup> Tau walehimi Yoni, amaka ta wibolu emosi  
 Yesu Keliso uyahina taumi po tau, uyahinei  
 tan’omtaibagibagi wiyuwa po witai uyahihi  
 Guyau anani taniwaga binei. Tau Yaubada a baha  
 a guuguyeya ma Yesu Keliso tuwegana binei hi  
 panu po Patimo bonabonana uyahina a memae.

<sup>10</sup> Guyau a iyeta uyahina Alugo Woiyawa  
 uyahiu mayana a waya ma baha baneina gehouna  
 a noonoli mei himogo u muliu i ibaabani

<sup>11</sup> i pa, ‘Awai u gagalehi una giluma hopunehi  
 po pepa pilipilina una himili tu witumagana hai  
 bolu magouhi 7 uyahihi. Naka dohuhi Epeso,  
 Simuna, Pegamum, Tayataila, Sadisa, Piladepiya,  
 Leodisiya.’

<sup>12</sup> Ega yaka a pa iyai uyahiu e ibaabani po a  
 luhagawileu po ipa a galeyā, yayata ani hounahi  
 magouhi 7 a galehi gole uyahihiyei hi dewahi.

<sup>13</sup> Ma u tipolihi lawa gehouna a gagaleyā gale-  
 nana amaka mei Lawa Moinana, a lului dao-  
 daona i hopu po u aena, ma a dagilolo gole.

<sup>14</sup> Ma unununa apala wakekena mei kehoi, ma matana ani galenahi mei mayau alalatana.

<sup>15</sup> Ma aena namalana mei pawasi ebebalana ma ponana mei tapatapana gololona.

<sup>16</sup> Ma ubona magouhi 7 awala hinebawanei i wohepahi ma u gamona kwasikwasi mena luwaluwaga komkomna i lugeleteya ma tepana galenana mei kabudala a wimatatona.

<sup>17</sup> A galeya ma u aena a guli hopu po a lauhi-lageu. Ega yaka awala hinebawana uyahiu i houni ma i baha i pa, 'Ega una matomatouta tau tu tahaya po tu wimuli.

<sup>18</sup> Una galeu tau lolowa a hilage ma a luyagohana meme po a memae houga tuwetuwenai. Tau hilage taniwagana po hiyoyowa matetana ani'mhoena a womomohi.

<sup>19</sup> 'Geka houkana ginouli u gagalehi ubeihi un'omgiluma amaka hi wawala ma houga he nenei hina lugeletehi.

<sup>20</sup> Geka ubonahi magouhi 7 u gagalehi u awala hinebawau po yayata ani hounahi magouhi 7 u gagalehi naka anohi hi wipilipili дума, yaka apo uyahim a liyayahi. Ubona naka tu winoyanoya, ma tu winoyanoyahi tauhi omi tu galena itete. Ma yayata ani hounahi naka tu witumagana omi bolu magoumi 7.'

## 2

### *Mi Epeso hai tuwega*

<sup>1</sup> Lawana i baha mai uyahiu i pa, 'Tu witumagana boluhi u Epeso he memae hai tuwega una gilumi po hai tu winoyanoya una paliweleya una pa,

Baha geke he nenehi tau uyahiugei ubona magouhi 7 awala hinebawaugei a womomohihi, ma yayata ani hounahi magouhi 7 u tipolihi a lautowolo nae uyahiugei. Tau u wipaliwelena uyahimi a pa:

<sup>2</sup> Amaka a hanapugemi omi bagibagi a lata po omi omtaibagibagi ubeihi o kadidili po lawa apapoe o wihinigigiyehi po tu wituwetuwega koyamahi tau biugei o ludadanihi po hai koyama o hanapugehi.

<sup>3</sup> Ma omtaibagibagi o hanapugeya uyahinei bagibagi baneihi po witewiteihi uyahihi ega ota tapiya, tau gowau binei.

<sup>4</sup> Ma tau ginouli gehouna uyahimi a gagaleya ega ita dewadewa, babana lolowa o luhogalena dumau ma geke hougana o peu po amaka o wohouna.

<sup>5</sup> Yaka omi peu binei ona winugonugotuhu imahi ma ona nugobui po ona bagibagi imahi mei lolowa. Ma inapa ega ona nugobui apo a nehi uyahimi po omi yayata ani hounana a wihaleya.

<sup>6</sup> Ma a hanapugemi ginouli dewadewana gehouna uyahimi naka Nikoletana hai dewa apa-poehi o wihinigigiyehi mei tau gasi naka pitena.

<sup>7</sup> Ma inapa taumi iyawoi anai tanigami yaka Alugo Woiyawa a baha tu witumagana bolumi ona nonoli. Ma taumi iyawoi ona kadidili yaka apo luyagohana mayouna ugonu Yaubada a tano dewadewana uyahina e memae a welemi.'

### *Mi Simuna hai tuwega*

<sup>8</sup> Lawana i baha meme uyahiu i pa, 'Tu witumagana boluhi u Simuna hai tuwega una gilumi, po

hai tu winoyanoya una paliweleya una pa,

Baha geka he nenehi tau tu tahaya po tu wimuli uyahiugei. Tau amaka a hilage po a towolo meme po a yautuwe a memae. Tau geka a ibaabani a pa:

<sup>9</sup> Amaka omi wiyuwa a hanapugehi po omi widayadayabu. Ma ipa ona hanapugeya omi wasawasa tau u matau. Ma lawa gehouhi hi igowena mehi mi Yudeya hai bolu ma eega tauhi Tomodulele a bolu, uyahinei he palipaliwinamemi.

<sup>10</sup> Ega ona matomatouta apo inapa ginouli awai binei ma wiyuwa ona tuhagaya naka apo Tomodulele ina ludadanimi po gehoumi hina panimi po hoi numa panipani hina hounimi, ma tamogi omi witeihi naka mei iyeta magouhi 10 ubeihi. Ma ona towolo kadidili po a siga hilage yaka apo omi meiha yautu memewahagana a welemi.'

<sup>11</sup> Ma inapa taumi iyawoi anai taniganami yaka Alugo Woiyawa a baha tu witumagana bolumi ona nonoli. Ma apo taumi iyawoi ona kadidili yaka apega hilage wilugana ina wiapa-poenimi.

### *Mi Pegamum hai tuwega*

<sup>12</sup> Lawana i baha meme uyahiu i pa, 'Tu witumagana boluhi u Pegamum he memae hai tuwega una gilumi po hai tu winoyanoya una paliweleya una pa,

Baha geka he nenehi tau uyahiugei u kwasik-wasi mena luwaluwaga komkomna a ibagibagi. Tau uyahimi a ipaliwelena a pa:

<sup>13</sup> Amaka a hanapugemi tupo naka uyahina o memae Tomodulele anani taniwaga. Ma tamogi o witumagana po ega ota bowibowiyeu. Ma hougana tu kawamoineu dewadewana Anitipasa hi laihilageni omi dobu uyahina, taumi o towolo kadidili.

<sup>14</sup> Tamogi omi dewa gehouhi ubeihi ega ata kaoha, babana gehoumi omi dewa mei Balama. Tauna lolowa Balaki i wiatatiyeya po mi Isalaela ani peu hi wotagoya po talaoloto hi witumaganeya po aniani hi yamweleneya po hi anani ma hi matamatamaga.

<sup>15</sup> Naka pitenana gehoumi Nikoletana hai wiatatiyana apapoehi o wootagohi.

<sup>16</sup> Uyahinei geke hougana omi apapoe uyahihiyei ona nugobui. Ma inapa ega apo houga kikina ma a nehi po a wigawiyemi kwasikwasi gamougei e gelegeleta uyahinei.

<sup>17</sup> Ma inapa taumi iyawoi anai tanigami yaka Alugo Woiyawa a baha tu witumagana bolumi ona nonoli. Ma apo taumi iyawoi ona kadidili yaka aniani yadei gowagowadana a welemi. Ma emosi po emosi uyahimi apo gaima wakewakekehi a gutaya, ma gaimahi uyahihi naka gowami wouhi he memae, naka ega iyai gehouna emoemotana po ina hanapugeya ma iyai tauna tu tama tunawana apo ina hanapugeya.'

### *Mi Tayataila hai tuwega*

<sup>18</sup> Lawana i baha meme uyahiu i pa, 'Tu witumagana boluhi u Tayataila, hai tuwega una gilumi po hai tu winoyanoya una paliweleya una pa,

Baha geke he nenehi naka tau Yaubada Natuna uyahiugei, tau matau galenana mei mayau ebebalana, ma aeu mei pawasi namanamalina.

<sup>19</sup> Geka tau u wipaliwelena uyahimi a pa:

Omi bagibagi po omi luhogala po omi witu-magana po omi wiponawogo po omi omtaibag-ibagi, amaka a hanapugehi geke hougana a hanapugemi o wobagibagi duma ma lolowa eega.

<sup>20</sup> Ma ginouli emosi hota binei ega ata kaoha, babana wawine gowana Yesabeli ega ota wi-hinigigiyeya. Ma tauna i bahena meya i pa, tu bahapiko. Ega tauna ma e ikoyakoyama. Matababana wawine naka u tu bagibagi i wiatatiyena powahi po he matamatamaga ma i niyehi talaoloto uyahina po he itumagana ma a yam tupona he anani.

<sup>21</sup> Naka wawinena a gaogao amaka a weleya po ipa apapoe uyahinei ina nugobui ma ega ita luhogaleya.

<sup>22</sup> Uyahinei apo totogo a weleya po iya-woi tauhi mitehi hina matamatamaga yaka apo wiyuwa baneina hina tutuhagaya, apo hai dewa apapoehi uyahihiyei ega hina nugobui yaka.

<sup>23</sup> Ma natunatuna apo a lihilagenihi po tu witumagana bolumi ona hanapugeu, tau lawa atapumi omi winugonugotuhu magomagouhi a hanapugehi po atapumi apo a wimihemi awai po awai o dewadewahi omi bagibagi apapoehi po dewadewahi uyahihiyei.

<sup>24</sup> Ma taumi mi Tayataila Yesabeli a wiatatiyana ega ota wootagoya po Tomodulele

a bagibagi hinehi ega ota hanapugehi yaka apega lugagayo gehouna a welemi,

<sup>25</sup> tamogi ona towolo kadidili omi witumagana uyahina po a siga a gunawilena meu.

<sup>26</sup> Ma apo taumi iyawoi ona kadidili po u nugotuhu ona dewadewaya ina nae po ani kokoe uyahina yaka apo taniwaga a welemi po tupo atapuhi ona taniwagehi mei Amau taniwaga i weleweleu pite.

<sup>27</sup> Mei Buka gilumana i pa,

“A taniwaga ina kadidili po lawa ina taniwagehi mei kodila pawapawasi uyahinei walata ta lauhedali.”

<sup>28</sup> Ma apo ubona malatomtom a welemi. Ma inapa taumi iyawoi anai tanigami yaka Alugo Woiyawa a baha tu witumagana bolumi ona nonoli.’

### 3

#### *Mi Sadisi hai tuwega*

<sup>1</sup> Lawana i baha meme uyahiu i pa, ‘Tu witumagana boluhi u Sadisi hai tuwega una gilumi po hai tu winoyanoya una paliweleya una pa,

Baha geke he nenehi tau uyahiugei tau Yaubada Alugona tupo magouhi 7 uyahiu e memae ma ubona magouhi 7 tau a womomohi. Tau geke a ipaliwelena uyahimi a pa:

Omi bagibagi amaka a hanapugehi ma lawa he hunehunemi ipa ota dewadewa дума ma tamogi ega kikina ota dewadewa babana taumi tu tapitapiya lawami.

<sup>2</sup> Yaka taumi omi witapitapiya uyahinei ona kadidili meme Yaubada a hanapu habuluna u



nugonugomi e memae ona wilataya po ega ona tapitapiya duma. Babana a hanapugeya omi bagibagi Yaubada u matana ega hita dumalu imahi.

<sup>3</sup> Odubona amaka hi wiatatiyemi po o nonoli yaka ona nugotuhuya ma ona wiponawogo po ona nugobui. Ma inapa ega omi witapitapiyagei ona kadidili meme yohola apo a nehi po a laigo-holimi mei tu danene ega ota hanapugeya iyeta awai apo a nehi uyahimi.

<sup>4</sup> Taumi mi Sadisi gehoumi omi luilui hi yeuyeu yaka apo yohola taumi ma tau po ta negogona ata luilui wakewakekehi yawa babana taumi i linanami.

<sup>5</sup> Naka pitenana apo taumi iyawoi ona kadidili yaka taumi apo a luilui wakewakekena ona luiya po apega gowami a hoehoe haleya yautu bukana uyahina ma apo gowami a hiyahiyawihi Amau u matana po a tu winoyanoya u matahi.

<sup>6</sup> Ma inapa taumi iyawoi anai tanigami yaka Alugo Woiyawa a baha tu witumagana bolumi ona nonoli.'

### *Mi Piladepiya hai tuwega*

<sup>7</sup> Lawana i baha meme uyahiu i pa, 'Tu witumagana boluhi u Piladepiya hai tuwega una gilumi po hai tu winoyanoya una paliweleya una pa,

Baha geke he nenehi tau woyeuyeu hotau, po dumadumaluwe uyahiugei ma tau gasi Dawita a gudu ani'mhoena u nimau e memae apo gudu a hoeya ega emoemotana po iyai ina guduya ma apo a guduya yaka apega iyai ina hoeya.

<sup>8</sup> Tau geke a ipaliwelena uyahimi a pa:

Omi bagibagi amaka a hanapugehi ma a hanapugeya omi kadidili ega ita lata ma tamogi

u baha o wotagohi ma ega ota bowibowiyeu. Amaka mateta a hoeya u matami, po ega emoemotana iyai gehouna ina guduya.

<sup>9</sup> Tomodulele a bolu apo a liyababaya babana hi koyama po hi pa, tauhi mi Yudeya po he palipaliguyoguyougemi yaka apo a weluwinihi po hina nei u matami po hina polou, po atapuhi hina hanapugeu tau a luhogalemi.

<sup>10</sup> Apo yohola houga witai ina gelegeleta hoi hipuli lawa atapuhi a ludadanihi ma taumi houga witai uyahina apo a galena itetemi babana u baha o wiponawogogeya po biugei omtaibagibagiyena memi.

<sup>11</sup> Kikina ma apo a nehi, ma omi witumagana ona womomohi po ega tu apapoe gehouna uyahimiyei unuhau waimihana ina wiwihaleya.

<sup>12</sup> Ma apo iyawoi ona kadidili yaka a tanigawemi po ona wiogola u Yaubada a numa dalabu binei po ega ona nenehaleya ma uyahimi apo u Yaubada gowana a gilumi po u Yaubada a dobu uyahina ona mae, naka dobu Yelusalem wouna yohola apo yadei ina hopu mai u Yaubada uyahinei. Ma uyahimi gowau wouna a gilumi.

<sup>13</sup> Ma inapa taumi iyawoi anai tanigami yaka Alugo Woiyawa a baha tu witumagana bolumi ona nonoli.'

### *Mi Leodisiya hai tuwega*

<sup>14</sup> Lawana i baha meme uyahiu i pa, 'Tu witumagana boluhi u Leodisiya, hai tuwega una gilumi po hai tu winoyanoya una paliweleya una pa,

Baha geke he nenehi tau uyahiugei tau tu limoina dewadewau po lawa hi kawamoineu.

Tau Yaubada a wiwiwala tu wawaliyena yaka a ipaliwelena uyahimi a pa:

<sup>15</sup> Omi bagibagi amaka a hanapugehi, ega wipoya po ega wayau ma u tipolina o memae yaka o lauluwaluwaga.

<sup>16</sup> Taumi o lauluwaluwaga po ega dagihami uyahinei apo tau gamougei a howena halemi.

<sup>17</sup> Taumi o pa, “Tauyai tu wasawasa po to wigapola yaka ginouli atapuhi emoemotiyai,” ma ega ota hanapugeya taumi o nugonugodubu po o inugotootogo babana nugonugomi hi widaya-dayabu po matami hi keke po a kowakowami.

<sup>18</sup> Uyahinei a paliwelemi apo uyahiugei gole dewadewahi ona gimala po ona wiwasawasa ma luilui wakewakekehi ona gimala po ona luinihi po omi wikowakowa ega ona ihinimaeni, ma mula-mula ona gimalehi po matami ona mulamulahi po hina lugiigilihi.

<sup>19</sup> Ona hanapugeya taumi iyawoi a luhogalemi po wiyuwa ma wihinigigiyanu uyahihiyei a iatatiyemi yaka ona nugobui po ona kadidili.

<sup>20</sup> Ona lautanigana imahi, omi mateta uyahina a towotowolo ma a ilulougo. Ma inapa tam iyai ponau una nonoli yaka gudu una hoeya ma a lui mahi om numa u hinena po tam ma tau ta wiheliheliyam po ta am gogona.

<sup>21</sup> Ma apo iyai tauna ina kadidili yaka a weluwaya po mitehi u ani mae wasawasa uyahina to tugula po to taniwaga gogona. Mei tau a kadidili po Amau anani mae waswasana uyahina mitehi to tugutugula pite.

<sup>22</sup> Ma inapa taumi iyawoi anai tanigami yaka

Alugo Woiyawa a baha tu witumagana bolumi ona nonoli.’

## 4

### *Yada tu miyena Yaubada uyahina he polopolou*

<sup>1</sup> Naka ginoulihi u mulihi ma a itotolana po mateta hoehoena hoi yada a galeyā. Ma lolowa lawa ponana a nonoli mei himogo i baha meme uyahiu i pa, ‘Una gei po a wiatatiyem po apo houga he nenei awai hina gelegeleta tam una galehi.’

<sup>2</sup> Mala emosi Alugo Woiyawa a kadidili mayana a waya, uyahinei taniwaga gehouna hoi yada a gagaleyā anani mae wasawasana uyahina i tugutugula.

<sup>3</sup> Ma Galenana i namanamali ma a gagaleyā mei gaima diidigahi ebalahi. Ma ani mae wasawasana hulele a wiidaidaga i towolo wiiwileya.

<sup>4</sup> Ma ani mae wasawasa magouhi 24 hi mewiwileya ma ani tugula hi emosi po emosi uyahihi tanitaniwaga hi tugula hai kaleko wakewakekehi ma hai unuhau gole unubolihi hi hounihi. <sup>5</sup> Ma ani mae wasawasana u tipolina ginouli gehouna i gelegeleta namanamalina ma gololona mei palele. Ma ani mae wasawasa u naona lampa magouhi 7 hi lauhelehelele, naka tauhi Yaubada Alugona tupo magouhi 7.

<sup>6</sup> Ma ani mae wasawasana u naona ginouli gehouna i namanamali mei dumola dewadewana boga u tepana, galenana mei hilo ma i lugiigila imahiyena dumaya.

Ma ani mae wasawasa u liyaliyana mimituwa wohepali hi towolo wiiwileya ma matahi upuhi po yapahi hi hogohi.

7 Mimituwa gehouna galenana mei laiyni ma wiluwagana mei bulumakau ma witonugana tepana galenana mei lawa, ma wiwohepalina galenana mei magisubu ina lupalupa.

8 Ma emosi po emosi apapehi magouhi 6 ma apapehihi uyahihi mata hi wihogohi apapehi tepahi po gaboulihi. Ma houga magomagouna iyeta po uguwa he ibaabani he pa,

‘Waiwoiyawam, Waiwoiyawam, Waiwoiyawam.

Guyau Yaubada Tu kadidili,

Tam odubona po amalai po houga he nenei uyahihi e memae.’

9 Ma tauna Tu metuwetuwenai anani mae wasawasa uyahina i duhuna ma houga magomagouna geke mimituwahi he lulougo ma he wotalagiyeya ma he iyateyateya ma he imaamala uyahina,

10 houga magomagouna geke mimituwahi he ibaabani ma tanitaniwaga magouhi 24 he polopolou hopu meme tuwetuweneina tauna anani mae wasawasa u matana he polou po he wotalagae. Ma hai unuhau wasawasahi ani mae wasawasa u matana he huhouna hopunehi ma he ibaabani he pa,

11 ‘Tam i Yaubada po i Guyau,  
i linanam to wotalagiyem ma to wiyateyatem,  
ma om taniwaga una tuhagaya

babana tam om maninigei ginouli atapuhi u wiwawalihi,  
tunawam om nugotuhugei u wiwawalihi po amalai he memae.’

## 5

### *Buka numunumulana, ma Sipi Natuna*

<sup>1</sup> Ega yaka tauna ani mae wasawasana uyahina i tugula ma a gagaleya awala hinebawanei pepa numunumulana i wogowogoya giluma u hinena po u upuna, ma pepana hi lautami lugagayo magouhi 7.

<sup>2</sup> Ma tu winoyanoya kadikadidilina gehouna a gagaleya ma i otu labatana i pa, 'Iyai i linanaya apo geke pepana lutamina ina lupena haleya ma ina lagahi.'

<sup>3</sup> Ma ega iyai gehouna hita tuhagaya hoi yada bo hoi hipuli bo u hiyoyowa po ipa apo gulawahi ina lupenihi ma bukana hinena ina galeya.

<sup>4</sup> Ega yaka a tou duma babana ega iyai gehouna a linanaya ipa pepana lutamina ina lupena halehi ma hinena ina galeya.

<sup>5</sup> Ega yaka tanitaniwagahi uyahihiyei lawa gehouna i baha mai uyahiu i pa, 'Ega una tutou babana laiyonu Yuda a gugunigei amaka i kadidili po apo gulawa lutamina magouhi 7 ina lupena halehi ma pepana ina lagahi po ina hiyawwi, tauna Dawita goga mulina.'

<sup>6</sup> Ma ani mae wasawasa u tipolina Sipi Natuna a gagaleya mimituwa magouhi wohepali u tipolihi i towotowolo po gasi tanitaniwagahi u tipolihi, ma Sipina Natuna galenana mei lawa hi laihilageni. Ma donana magouhi 7 ma matana magouhi 7, naka matahi Alugo Woiyawa hipuli atapuna uyahihi e itotolana.

<sup>7</sup> Ma Sipina Natuna i nae po pepa i waya tauna ani mae wasawasa uyahina i tugutugula u awala hinebawana

<sup>8</sup> i waya ma mimituwahi po tanitaniwagahi hi polou hopu Sipi Natuna uyahina ma emosi po emosi hai gita ma hai gaeba gole. Ma gaebahi u hinehi dadi dimudimumuna hi apuya, naka Yaubada tu wiwoiyawena hai lupali e gegae uyahina.

<sup>9</sup> Ma lougho wouna hi lawi hi pa,  
 ‘Tam i linanam po naka pepana una waya,  
     ma i linanam po lutamihi una lupenihi  
 babana amaka hi wihilagenim  
     po talamgei lawa u wimihehi Yaubada binei.  
 Ma apo bolu po bolu, pona geha po pona geha,  
     ma guguni po guguni, ani taniwaga po ani  
     taniwaga atapuhihi uyahihiyei una wimi-  
     hehi.

<sup>10</sup> Tam u wiwawalihi po om ani taniwaga uyahina hina witotalaguyaba ata Yaubada binei po gasi hoi hipuli hina wiwasawasa.’

<sup>11</sup> Ma tu winoyanoya a gagalehi hi maga duma, tausana po tausana, ega emoemotau a hiyawa pahi, ani mae wasawasana po mimituwahi po tanitaniwagahi hi towolo wiiwilehi ma hi ibaabani

<sup>12</sup> ma hi ototu labatana hi pa,  
 ‘Sipi Natuna hi laihilageni i linanaya  
     taniwaga po wasawasa po hanapu po kadidili  
     po wiyateyate po wotalagae po omhuna ina  
     tuhagahi.’

<sup>13</sup> Ma wiwawala emosi po emosi hoi yada po hoi hipuli, po hipuli ma boga u hinehi po gasi a

wiwawala tupo atapuhi uyahihi a noonolihi ma hi  
ibaabani hi pa,

‘Yaubada ani mae wasawasana uyahina i tugula  
ma Sipi Natuna mitehi

ta hunena emotehi ma ta wiyateyatehi po ta  
wotalagiyehi

babana tauhi Tu kadidili houga magomagouna po  
ega anani kokoe.’

<sup>14</sup> Ega yaka mimituwa wohepalihi hi baha hi  
pa, ‘Moina,’ ma tanitaniwagahi hi polou hopu  
uyahina ma hi wotalagae.

## 6

### *Lutama magouhi 6 hina lupena halehi*

<sup>1</sup> Sipi Natuna a gagaleya ma gulawa tahata-  
hayana i lupeni ma mimituwa tahatahayana po-  
nana a noonoli mei palele ma i pa, ‘Una nei.’

<sup>2</sup> Ega yaka a itotolana ma hosi wakewakekena  
gehouna i geleta ma tu gelugeluna u nimana pidu  
ma a unuhau wasawasana Yaubada i weleya ma i  
nae i wigawiya po i kadidili.

<sup>3</sup> Ma Sipi Natuna gulawa wiluwagana i lu-  
pena haleya ma mimituwa wiluwagana ponana a  
noonoli ma i pa ‘Una nei.’

<sup>4</sup> Ega yaka hosi kayakayana i geleta ma tu  
gelugeluna Yaubada wipoya ma gawiya kwasik-  
wasina i weleya po ipa gawiya ina neiyai hoi  
hipuli po lawa atapuhi hina igawiyena mehi.

<sup>5</sup> Ma Sipi Natuna gulawa witonugana i lu-  
pena haleya, ma mimituwa witonugana ponana  
a noonoli ma i pa, ‘Una nei,’ a itotolana ma hosi



uguguwana i geleta ma tu geluna ani'msikeli u nimana yaniyani binei.

<sup>6</sup> Ma gehouna ponana a noonoli mei mimituwa wohepali u hayahigei i geleta po i otu i pa, 'Aee, kihoni gomala baneina: pegapega emosi mihana kina wabihaga, ma yaniyani upumana emosi mihana kina wabihaga. Ma bunama po wine ega ona lauguyoguyougehi.'

<sup>7</sup> Ma Sipi Natuna gulawa wiwohepalina i lupena haleya, ma mimituwa wiwohepalina ponana a noonoli ma i pa, 'Una nei.'

<sup>8</sup> Ega yaka a itotolana ma hosi ega ita wakeke imahi ma i geleta. Ma tu geluna gowana Hilage, ma Hiyoyowa u liyaliyana i wootagoya. Hai luwagahi Yaubada uyahina hai taniwaga amaka hi waya po ipa apo lawa hina hamaga halehi gawiya uyahinei po omhilage uyahinei po totogo uyahinei po gamogamo woyahiyahihi uyahihiyei. Ma ega ipa lawa ataputa ma lawa kahakahana hipuli tupo wohepali uyahina, ma bolu emosi uyahinei atapuhi apo ina hamaga halehi ma bolu tonuga hina memae.

<sup>9</sup> Ma Sipi Natuna gulawa winimitutuna i lupena haleya, ma Yaubada anani witalaguyaba u gaboulina a lawa alugohi a galehi, tauhi tu mehipuli hi laihilagenihi babana Yaubada a baha tu kawamoinena.

<sup>10</sup> Ma alugohi ponahi hi lata ma hi ototu hi pa, 'Guyau Tu kadidili dumam po tam waiwoiyawam po dumadumalum, meyanai apo lawa hoi hipuli hi laihilageniyai una luhetalehi ma una wimihehi hai apapoe ubeihi?'

<sup>11</sup> Ega yaka hai luilui wakewakekehi i welehi ma i paliwelehi houga kukuna hina iononana a siga walewalehihi hoi hipuli hina lihilagenihi po mei lolowa tauhi hi laihilagenihi pite Yaubada a bagibagi binei po hai hiyahiyawa emoemotahi ma apoma Yaubada tu mehipuli ina wimihehi.

<sup>12</sup> A itotolana ma Sipi Natuna gulawa wisikisina i lupena haleya, ma guhuguhu baneina i geleta po kabudala i uguwi po galenana mei walata upuna ma wamaahiya i kaya po mei tala,

<sup>13</sup> ma ubona hi pipeu hopu mai galenahi mei mayau ugonu togowa baneina ina guhuguhuya ma ina holuholu.

<sup>14</sup> Ma yada a gagaleya mei pepa i pilipili po i yababa, ma oya emosi po emosi po bonabona i huwena yoyogehi hai ani mae uyahihiyei.

<sup>15</sup> Ma tauhi Yaubada tu wihinigigiyena naka hipuli wasawasahi po tanitaniwagahi po gawiya kapekapehahi po tu waigapola po tu kadidili po tu bagibagi po lawa hota atapuhi hi lowo gae hoi oya po gaima u domohi hi megowada.

<sup>16</sup> Ega yaka hi otu oya po gaima uyahihi hi pa, 'Ona peu hopu mai po ona guluwiyai po tauna anani mae wasawasana uyahina e tugutugula po Sipi Natuna ega hina gagaleiyai.

<sup>17</sup> Matababana hai uyogigai iyetana amaka i geleta, ma ega emoemotana iyai ina towolo matanihi.'

## 7

*Mi Isalaela hai wekiwekilala u tepahi hi gilumih*

<sup>1</sup> Geka ginoulihi u mulihi tu winoyanoya magouhi wohepali a gagalehi hipuli tupo wohepali uyahihi hi towotowolo. Tu winoyanoyahi togowa matana wohepali hai ani togo mai hi luguduhi yaka dumola baneina i geleta hoi hipuli po hoi boga po mayau luguluguhi ega hita idagudagu.

<sup>2</sup> Yaubada i baha ipa tu winoyanoyahi hipuli ma boga hina wiapapoenihi. Apoma tu winoyanoya gehouna a gagaleya kabudala anani geleta uyahinei i nenei naka u nimana Yaubada lauyagohanana a wekiwekilala ani'mgiluma lawa u tepahi ina gilumihi. Tu winoyanoyana i otu a lawa wohepali uyahihi

<sup>3</sup> i pa, 'Hei, ega hipuli po boga po mayau ona iapapoenihi, ma ata Yaubada a tu bagibagi hai wekiwekilala u tepahi ta houna tahaehi.'

<sup>4</sup> Ega yaka wekiwekilala mi Isalaela gehouhi u tepahi hi hounihi ma u mulina a noonoli mi Isalaela hai maga tausana 144 naka Isalaela googana uyahihiyei.

<sup>5</sup> Yuda gugunina uyahinei lawa magouhi tausana 12 hai wekiwekilala u tepahi hi hounihi. Naka pitenana Isalaela googana atapuhi uyahihiyei hai wekiwekilala hi hounihi.

Lubena a guguni uyahinei tausana 12  
ma Gada a guguni uyahinei tausana 12

<sup>6</sup> ma Asa a guguni uyahinei tausana 12  
ma Napatali a guguni uyahinei tausana 12  
ma Manase a guguni uyahinei tausana 12

<sup>7</sup> ma Simiyona a guguni uyahinei tausana 12  
ma Libai a guguni uyahinei tausana 12  
ma Isako a guguni uyahinei tausana 12

<sup>8</sup> ma Sebuloni a guguni uyahinei tausana 12  
 ma Yosepa a guguni uyahinei tausana 12  
 ma Beniyamina a guguni uyahinei tausana 12.

*Yaubada a bolu banei dumana*

<sup>9</sup> Geka u mulina a itotolana po patala banei dumana a gagaleya ega emoemotana a hiyawa pahi. Geka lawahi naka tupo hayana wohepali hai ani taniwaga emosi po emosi uyahihiyeyi, guguni emosi po emosi uyahihiyeyi, po tupo emosi po emosi uyahihiyeyi po pona emosi po emosi uyahihiyeyi, atapuhihi hi wootalagae ani mae wasawasana uyahina. Yaubada ma Sipi Natuna u matahi hi towotowolo hai kaleko wakewakekehi ma beda luguluguhi hi wogowogohi.

<sup>10</sup> Ponahi hi lata ma hi wootalagae hi pa,  
 ‘Yaubada, tam ani mae wasawasa uyahina e duhuduhuna  
 tam ma Sipi Natuna to wootalagiyemi babana luyagohana uyahimiyeyi he nenei.’

<sup>11</sup> Ma tu winoyanoya atapuhi, tanitaniwaga, mim-ituwa wohepali, Yaubada mitehi hi towolo wi-iwilehi ma hi polou po Yaubada u matana hi wootalagae,

<sup>12</sup> hi pa,

‘Moina, tam wotalagae po wasawasa po hanapu po wimaamala po wiyateyate po manini po kadidili atapuhi

geka Yaubada tam galimgei houga tuwetuwenai. Moina.’

<sup>13</sup> Ega yaka tanitaniwagahi uyahihiyeyi emosi i lubayadeu i pa, ‘Iyawoi geka hai kaleko wake-wakekehi? Ma miyeyi hi nei?’

<sup>14</sup> Ega yaka tau uyahina a pa, ‘Bada tam u hana-pugehi. Tau eega.’

Yaka i paliweleu i pa, ‘Geka lawahi hipuli a wiyuwa baneina hi wialoni ma hai kaleko Sipi Natuna talanei hi ogahi po hi wakeke meme.

<sup>15</sup> Naka binei

Ma Yaubada anani mae wasawasa u matana he memae iyeta po ididibala ma wotalagae bagibagina he dewadewayaya a numa dalabu u hinena.

Ma Yaubada anani mae wasawasa uyahina e duhuduhuna tauna apo ina galena itetehi.

<sup>16</sup> Lolowa om hi hilage, geka hougana apega om hina hilage,

lolowa uyopopohi hi haleyanihi ma geka hougana apega uyopopohi hina haleeyana mehi,

lolowa kabudala a wipoya i lalanihi ma geka houga apega kabudala mayana hina waya.

<sup>17</sup> Matababana Sipi Natuna ani mae wasawasana u tipolina e memae,

tauna hai tu galena itete yaka apo ina tahaehi goila huuhulana uyahina yautuhi binei,

ma Yaubada apo mata diligwegwehi ina hamaga halehi.’

## 8

### *Gulawa anani kokoe ma gaeba namanamalina*

<sup>1</sup> Sipi Natuna lutama wisebeninai lupena haleya ma kabudala tupona u hinena ega kikina pon-pona bo gololo gehouna hoi yada ata nonoli.

<sup>2</sup> Ma u mulina tu winoyanoya magouhi 7 Yaubada u matana hi towotowolo a gagalehi ma hai himogo i welehi.

<sup>3</sup> Ma tu winoyanoya gehouna u nimana gaeba gole ma i nei po ani talaguyaba u liyaliyana i towolo. Ma Yaubada gaebana i lihogoya dadi dimudimumuna uyahinei po tu winoyanoya i weleya, ega yaka tu winoyanoyana dadi gaebana i houni ani talaguyaba uyahina ma i apuya po dimumuna Yaubada a lawa waiwoiyawahi hai lupali mitehi i wila emoteya ma he gegae Yaubada u matana.

<sup>4</sup> Ma tu wiwoiyawa hai lupali hi gegae dadi bogahuna mitehi tu winoyanoya nimanei Yaubada u matana po i kokoe.

<sup>5</sup> Apoma tu winoyanoyana gaebana i waya po ani talaguyaba mayouna alalatana uyahina i'mpoheya ma i halena hopuniyai hoi hipuli po namanamala ma palepalele ma gololo gehouhi ma guhuguhu hi geleta.

### *Himogo hina huwenihi*

<sup>6</sup> Tu winoyanoya magouhi 7 hai himogo hi wononogogehi po ipa hina huwenihi.

<sup>7</sup> Tu winoyanoya tahatahayana a himogo i huweni ma gadiwewe kapakapalana tala i wila emoteya mayau alalatana mitehi ma hi pipeu hopu mawahaga i hoi hipuli. Ma hipuli atapuna i boli tonugeya po tupo gehouna i alahi ma tupo luwaga hi dewadewa. Ma tuponana i alalahi naka mayau po hiyamoni atapuhi i ala pahi.

<sup>8</sup> Ma tu winoyanoya wiluwagana a himogo i huweni po ginouli banei dumana mei oya anai ebebalana ma i hopuneya hoi boga po boga i

witala, ma bogana i boli tonugeya po emosi i witala ma luwaga hi dewadewa.

<sup>9</sup> Ma bogana i itala u hinena iyana atapuhi hi hilage ma wam magomagouhi hi gunagolugoluhahi.

<sup>10</sup> Ma tu winoyanoya witonugana a himogo i huweni, ma ubona baneina hoi yada i alalata mei heuta ma i peu hopu mai hoi hipuli po hipuli i boli tonugeya po tuponana uyahina ubona hi yatoyo goila atapuhi po huuhula atapuhi hi wigola pahihi.

<sup>11</sup> Po ega yaka ubonana gowana ‘Wigola.’ Ma lawa magomagouhi goila hi umumahi po hi hilage pahihi.

<sup>12</sup> Ma tu winoyanoya wiwohepalina a himogo i huweni po kabudala tupo gehouna i uguwi ma tupo luwaga hi dewadewa, mei gasi wamaahiya tupo gehouna i uguwi ma tupo luwaga hi dewadewa, ma gasi ubona tupo tonuga uyahihi i kahahi po tupo gehouna uyahina i uguwihi ma tupo luwaga uyahihi hi yaayahihi. Uyahinei kabudala i loguya po wamaahiya ma ubona ega hita yayata imahiyehi.

<sup>13</sup> Ma a itotolana po magisubu baneina hoi yada i yaweyawewe ma ponana i lata po i ibaabani i pa, ‘Aee, aee, kihoni hoi hipuli tu mae. O winugotootogo hota, apo tu winoyanoya tonuga hai himogo hina huwenihi yaka wita baneina ina geleta.’

## 9

<sup>1</sup> Ega yaka tu winoyanoya winimututuna a himigo i huweni, ma ubona gehouna a gagaleya

amaka i peu hopu mai hoi hipuli ma ubonana domo daodaona ani'mhoena i waya,

<sup>2</sup> po domona i hoeya ma bogahu uguwana wopotopotona hi nenei i gelegeletai kabudala i guduya ma hipuli atapuna i uguwa wiwileya domona bogahuna binei.

<sup>3</sup> Ma bogahu hinenagei madimadi hi hopuhopu mai hoi hipuli. Giuhi wipoya hi wiwaya wiyuwana mei polipugo.

<sup>4</sup> Ma Yaubada i paligagalihi ipa ega hiyamoni po mayau po yaniyani lahalahahi hina iapapoenihi ma lawa tauhi ega Yaubada a wekiwekilala u tepahi ita memae tauhi hina wiapapoenihi.

<sup>5</sup> Ma madimadihi uyahihi ega ita pa, apo lawa hina tonatona ihilagenihi ma ipa hina wihini-wiyuwa hogohihi, wamahiya nimitutu u hinehi. Ma hai witonatona i wiyuwa duma po mei polipugo a witonatona.

<sup>6</sup> Ma wamahiya nimitutu u hinehi tu wiyuwa hilage hina laihunehuneya, ma apega hina hilage matababana hilage a baba hi bihena aweya.

<sup>7</sup> Ma madimadihi galenahi mei hosi amaka hi wononogo gawiya binei po unuhau gole unubolihi hi hounihi ma tepahi ani galenahi mei lawa tepata.

<sup>8</sup> Ma apalahi daohi mei wiwine apalahi ma niwohi hai kadidili mei laiyni niwohi.

<sup>9</sup> Ma nugonugohi ani wilagenana mei pawasi. Ma apapehi gololohi mei hosi wam titeinana ina bulibuliliyeni gawiya uyahina.

<sup>10</sup> Ma giuhi mei polipugo giuhi. Giuhihi uyahi-hiyei emoemotana apo lawa hina tonahi po



wama hiya nimitutu u hinehi hina iyuwa.

<sup>11</sup> Ma hai taniwaga tauna tu winoyanoya domona tu galena itetena gowana Hibulu ponahiyei hi pa Abadoni, ma mi Giliki ponahiyei hi pa Apoloni, ma anona naka Tu wiapapoe.

<sup>12</sup> Ma witai emosi amaka i kokoe ma witai luwaga he nenei.

<sup>13</sup> Tu winoyanoya wisikisina a himogo i huweni, ma pona gehouna gololona a noonoli ma i nenei naka ani talaguyaba uyahinei (ma ani talaguyabana gole ma donana wohepali Yaubada u matana i towotowolo).

<sup>14</sup> Ma ponana tu winoyanoyana uyahina i baha nae i pa, 'Tu winoyanoya mi yadena magouhi wohepali Yupiliti goilana baneina uyahina hi panihi po he memae una lupena halehi po hina nae.'

<sup>15</sup> Tu winoyanoya wohepalihi i lupenihi po hi nae, babana hougana po iyetana po wama hiyana po bolimana binei amaka Yaubada i wononogogehi, po ipa lawa hina lihilagenihi. Apo hipuli lawahi hina kahaya po bolu emosi hina uni pahi ma bolu luwaga hina memae.

<sup>16</sup> Ma tu winoyanoya hai tu wigawiya boluna a lata hi bahebaheya hipa, 'Lawa a lata miliyoni handele luwaga (200,000,000) atapuhihi hosi uyahinei he bulibulili.'

<sup>17</sup> Geka pitenana u enomatagagalenagei hosi a gagalehi tu gelugeluhi nugonugohi lagenahi hi huhounihi, gehouhi kayakayahi, ma gehouhi waidaidagahi, ma gehouhi woyogayogahi. Ma hosihi ununuhi mei laiyouni ma gamohiyei mayau ebe-bala huluhululuna ma bogahu ma yeu waipoyahi

hi gelegeleta

<sup>18</sup> po lawa hoi hipuli boluna hi kaha tonugeya po bolu emosi hi uni pahi ma bolu luwaga eg'awai. Geka ginouli tonuga uyahihiyei hi uni pahihhi mayau ebebalana ma bogahu ma yeu waipoyahi.

<sup>19</sup> Matababana hosihi hai kadidili u gamohi po u giuhi he memae, giuhi mei mota ununuhi ma niwohiyei lawa hi ananihi.

<sup>20</sup> Ma lawa atapuhi ega hita hilahilage ma ega hita nugonugobui, babana tauhi hai mulamula po alugo apapoehi hi itumaganehi ma Yaubada eega. Geka ginoulihi uyahihi hi polopolou, talaoloto nimahiyei hi dewadewahi po gole po siluba po kopa po gaima po mayau. Geka ginoulihi ega emoemotahi po hina galena po hina nonola po hina winenae ma tamogi hi itumaganehi.

<sup>21</sup> Geka lawahi hai omunugo po hai balau po hai matamaga po hai danene ega hita nehalehi.

## 10

### *Tu winoyanoya gehouna a nima pepana*

<sup>1</sup> Ma tu winoyanoya kadikadidilina gehouna yadei i hopuhopu mai ma a galeya, a luilui mei yaloi ma unununa hulele i towolo wiiwileya ma tepana mei kabudala po aena hi namanamalihi mei mayau ebebalana.

<sup>2</sup> Tu winoyanoyana u nimana pepa numunumu-lana hoehoe wahagina i wogoya ma i hopu mai po ae hinebawana hoi boga i utugogeya ma ae kehakehana hoi hipuli.

<sup>3</sup> Ponana i lata ma i otu, po gololona mei laiyni ina tutou. Ma otuna i kokoe ma palele magouhi 7 a bahana hi wimiheya.

<sup>4</sup> Palelehi ponahi gololohi a nonolihi po ipa a gilumihi, ma baha yadei a noonoli ma uyahiu i pa, 'Palele gololohi amaka u nonolihi una gowadihi ma ega una gilugilumihi.'

<sup>5</sup> Ega yaka tu winoyanoya hoi boga po hoi hipuli i towotowolo a gagaleya, ma awala hinebawana i wohepaya hoi yada

<sup>6</sup> po i wigwala i pa, 'Yaubada gowanei tauna memewahagana ginouli atapuhi hoi yada po hoi hipuli, po hipuli u hinehi he memae, ma boga hinena ginoulihi atapuhi tu wiwawalihi. Tauna gowanei a palipaliwelemi a pa, houga amaka i geleta

<sup>7</sup> po apo tu winoyanoya wisebenina a himogo ina huweni yaka Yaubada a nugotuhu gowagowadahi atapuhi hina lugeletehi po ina wikokowihhi mei odubona Yaubada a tu bagibagi naka a tu bahapiko hi bahebaheya pite.'

<sup>8</sup> Ma bahana lolowa yadei a noonoli a nonola meya uyahiu i ibaabani i pa, 'Una nae po tu winoyanoya a pepa hoehoe wahagina e towotowolo ma u nimana una wihaleya.'

<sup>9</sup> Ega yaka a nae po tu winoyanoyana uyahina pepana a lupaliyeya po i weleu ma i paliweleu i pa, 'I dewadewa una waya po una ani, ma una lumehaya po u koibam wigolana mayana una waya, ma u gamom gugouna mayana mei tuwoya.'

<sup>10</sup> Ega yaka pepana a waya po a ani, ma mayana a wiwaya u gamou i gugau po mei tuwoya, ma a lumehaya po koibau u hinena i wigola duma.

<sup>11</sup> Ma uyahiu i baha meme i pa, ‘Tam, Yaubada a baha una wibaabaniyeya lawa magomagouhi ubeihi po ani taniwaga emosi po emosi ubeihi po pona geha ubeihi po tu wasawasa ubeihi.’

## 11

### *Yaubada a tu limoina luwaga*

<sup>1</sup> Geka u mulina ma digona mei luwa ma i weleu ma i paliweleu i pa, ‘Una towolo po Yaubada a numa dalabu po ani talaguyaba una luwahi po tu tapalolo una hiyawihi.

<sup>2</sup> Ma numa dalabu u uputana ega una luwaluwaya, babana naka toumana ubeihi tauhi ega mi Yudeya. Tauhi dobu waiwoiyawana apo aehiyei hina tuigobugeya wama hiya 42 u hinehi. Naka bolima tonuga ma tupona.

<sup>3</sup> U tu limoina luwaga a himilihi hai luilui ani galenahi mei hiwahiwape ma tamogi apo u bahapiko hina bahebaheya u wipoyagei bolima magouna tonuga ma tupona\* u hinehi.’ <sup>4</sup> Tu limoinahi naka mayau oliweta luwaga, ma lampa luwaga, he towotowolo hipuli a Guyau u matana.

<sup>5</sup> Ma inapa iyai ina towolo po tu limoinahi ina wigawiya uyahihi, yaka apo gamohiyei mayau ebebalana ina geleta po ihalahi ina wiapapoeya po ina lihilageni.

<sup>6</sup> Geka hai luwagahi hai wipoya emoemotana po gadiwewe hoi yada hina guduya ipa hougana apo Yaubada a baha hina ipaliweleneya apega ina atuna. Ma hai wipoya emoemotana hina baha po goila hina witala. Ma hai wipoya emoemotana

---

\* **11:3:** Limoinana naka iyeta magouhi 1,260.

apo inapa wiyuwa houga awai nugonugohi po ina geleta apo ina geletai.

<sup>7</sup> Tu limoinahi hai wipaliwelena lawa uyahihi amaka i kokoe, ma mimituwa gehouna domo daodaona uyahinei i geleta po tu limoinahi i igawiyehi po i kadidila lagonihi po hi hilage luwaga.

<sup>8</sup> Ma hinihi hilahilagehi meygai baneina tahayana uyahina he'nenno, ma dobuna lolowa uyahina ata Guyau hi witakeya po baha gowagowadagei hi wigowaya hi pa Sodom bo Isipita.

<sup>9</sup> Iyeta tonuga ma tupona apo lawa mago-magouhi hina nei po hina ihalugehi, bolu po bolu, guguni po guguni, pona geha po pona geha, ani taniwaga atapuhi uyahihiyei. Apega hina baha po lawahi hilahilagehi hinihi hina guluwahi.

<sup>10</sup> Ma tu mehikuti hina kaoha tu bahapiko luwaga hai hilage binei, ma toleha hina dewaya po hai ani'mbenena emosi po emosi hina wele mehi, babana tu bahapikohi uyahihiyei wiyuwa baneihi tu mehikuti hi tuhagahi.

<sup>11</sup> Tamogi iyeta tonuga ma tupona hi kokoe ma Yaubada yautu i wele mehi po hi luyagohana meme, po anai yautuhi hi towotowolo ma lawa boluhi hi gagalehi po hi matouta duma.

<sup>12</sup> Ega yaka baha baneina yadei hi noonoli ma i ibaabani i pa, 'Ona gei geka hota.' Ega yaka yaloigei tu bahapikohi luwaga hi gegae ma hai gawiyahi hi gagalehi.

<sup>13</sup> Houga naka uyahina guhuguhu baneina i geleta po dobu baneina tupona gehouna i wia-papoeya po lawa magouhi <sup>7</sup> hi hilage guhuguhu

uyahinei. Ma lawa tupohi hi memae hi matouta  
duma ega yaka Yaubada hoi yada hi wotalagiyeya  
a kadidili binei.

<sup>14</sup>Uyahinei wiyuwa luwaga amaka hi kokoe, ma  
witonugana apo kikina ma ina geletai.

*Himogo anani kokoe hi huweni*

<sup>15</sup>Ega yaka tu winoyanoya wisebenina a hi-  
mogo i huweni, po hoi yada ponahi i lata ma hi  
ibaabani hi pa,

‘Geka hougana hipuli taniwagana apo a manini  
ina kokoe

ma Guyau a Besinana lawana mitehi u  
nimahi e memae.

Tauhi apo houga magomagouna hina tanitani-  
waga.’

<sup>16</sup>Ma tanitaniwagahi magouhi 24 Yaubada u  
matana hi tugutugula hai ani mae wasawasahi  
uyahihi, hi polou hopu Yaubada uyahina ma hi  
wotalagiyeya

<sup>17</sup>hi pa,

Guyau Yaubada tu kadidili dumam to maamalim  
tam houga hi kokoe po houga geka uyahihi e  
memae, to wimamala дума uyahim

babana om manini banei dumana u wogeleteya,  
po u wiwawala po ipa taniwagana una tani-  
wageya.

<sup>18</sup>Tauhi tu meuputa hi luuyogigai дума  
tamogi om luuyogigai a houga amaka i geleta,  
yaka tu hilage lawahi hi towolo meme po una  
luhetalehi  
ma om tu bagibagi naka om tu bahapiko hai  
meiha una welehi

po om lawa waiwoiyawahi muhomuhohi po  
balubaluhi  
po tauhi iyawoi tu wiyateyatem hai meiha  
una welehi.

Ma hipuli tu wiapapoena tauhi apo una wiapa-  
poenihi.'

<sup>19</sup> Ega yaka Yaubada numa dalabu hoi  
yada guduna i hoeya, ma hinena a gagaleya  
naka dedewaga waiwoiyawana u hinena  
wogatala gilugilumana i memae. Uyahinei ma  
namanamala po palele po guhuguhu po duba a  
gadiwewena gololohi hi lata duma ma hi geletai.

## 12

### *Wawine ma mogaya kayakayana*

<sup>1</sup> Wekiwekilala baneina gehouna hoi yada i  
laugeleteya naka wawine ma a luilui kabudala  
ma wamahaia uyahina i towotowolo, a unuhau  
ubona magouhi 12.

<sup>2</sup> Ma wawinena koikoibana po i wogowogo nae  
ma i ototu ipa ina wigunaguna.

<sup>3</sup> Ma wekiwekilala gehouna hoi yada i  
laugeleteya naka mogaya baneina kayakayana,  
ma unununa magouhi 7, ma donana magouhi 10,  
ma unuhau gegehi unununa i hounihi.

<sup>4</sup> Ma ubona bolu tonuga po bolu emosi mimi-  
tuwana giunei i wilawihi po i wihulu hopunehi  
hoi hipuli. Ma mogayana kayakayana wawinena  
u naona i towotowolo ipa apo wawinena ina igu-  
naguna yaka tewelana ina ani.

<sup>5</sup> Uyahinei wawinena i gunaguna po tewela  
olotona, tauna ipa tupo atapuna uyahina apo  
ina taniwaga a kadidiligei. Ega yaka tewelana

Yaubada i wihaleya po i gae anani mae wasawasa uyahina.

<sup>6</sup> Ma wawinena i lowo nae hoi balabala, po noka hotana wawine anani megowada Yaubada i inonogogeya uyahina i gagalena iteteya bolima tonuga ma tupona\*.

<sup>7</sup> Ega yaka hoi yada witona i geleta. Naka witonana Maikeli a tu winoyanoya mitehi ma mogaya kayakayana a tu poula mitehi ma hi gawigawiya,

<sup>8</sup> po mogayana a bolu mitehi ega emoemotana ipa hina kadidili Maikeli a bolu uyahihi, ma mogayana a tu poula mitehi hi wiyaga hopunehi po ega hai ani mae hoi yada.

<sup>9</sup> Ma mogayana baneina naka tauna mota odubo walihagana gowana Setani a bui Tomodulele, palouma hai taniwaga tauna tu mehikuti hai tu wikoyakoyama. Tauna a tu poula mitehi hi wihulu hopunehi hoi hipuli.

<sup>10</sup> Geka u mulina pona gehouna gololona baneina a noonoli hoi yada ma i pa,

‘Geka hougana Yaubada a wasawasagei po Keliso a taniwagagei manini

po luyagohana he gelegeleta

babana walewalehita tu wigouhi odubona tauna uguwa po iyeta

ma i towolo po Yaubada u matana i igouhi amaka yadei hi halena hopuneya.

<sup>11</sup> Baha dumana walewalehita yautuhi hi paliha-leya

po Keliso binei hi hilahilage

---

\* **12:6:** Limoinana naka iyeta magouhi 1,260.



naka tauhi Tomodulele mitehi hi gawiya po hi kadidili,

hai kadidili babana Sipi Natuna talana  
ma hai kawamoina Sipi Natuna uyahina binei.

<sup>12</sup>Uyahinei yada tu miyena atapumi ona kaoha.  
Tamogi taumi hipuli po boga tu miyehi witai baneina uyahimi,

babana Tomodulele a uyogigeina  
ma i hopu mahi uyahimi,

ma i hanapugeya a houga kuku hotana apo ina memae  
yaka apega a houga ina haleya.'

<sup>13</sup>Mehougana mogayana kayakayana i gaga-leya naka amaka hi halena hopuniyai hoi hipuli ega yaka wawinena tewela olotona i guniguni i wiyagaya.

<sup>14</sup>Ma Yaubada wawinena apape i weleya mei magisubu baneina apapena po uyahinei balabala yabayababa i lupa haleya, Yaubada i gowadi ma i gagalena iteteya bolima tonuga ma tupona ipa mota ega ina wodadani.

<sup>15</sup>Ega yaka motana gamonei goila i huwena hopuneya po mei goila ina hopu wawinena mulinei po ipa ina alugeya.

<sup>16</sup>Ma hipuli wawinena i haguya babana hipuli i gunahoeya ma goila atapuna i lumehaya.

<sup>17</sup>Ega yaka mogayana kayakayana i luuyogigai ma i nae wawinena a guguni uyahihi po i wigawiyehi, tauhi naka Yaubada a baha tu wiponawogogena po Yesu binei hi ibenabenama.

# 13

## *Mimituwa bogei i geleta*

<sup>1</sup> Geka u mulina hoi lekawa a towolo ma mimituwa gehouna a gagaleya ma boga uyahinei i gelegeletai donana magouhi 10, ma unununa magouhi 7 ma dona emosi po emosi hai unuhau gegehi, ma ununu emosi po emosi uyahihi Yaubada paliguyoguyouna i gilumihi.

<sup>2</sup> Ma mimituwana a gagaleya mei simai baneina pitepitei, ma aena galenahi mei hagwai aehi, ma gamona mei laiyni gamona. Ma mogaya kayakayana a wipoya mimituwana i weleya, po ani wiwasawasa po ani taniwaga baneina i weleya.

<sup>3</sup> Ma mimituwana unununa gehouna hi lihilageni ma i luyagohana meme. Naka binei ma lawa atapuhi nugonugohi hi gohogoholihi po mimituwana bogei hi wotagoya.

<sup>4</sup> Ma lawa atapuhi mogaya kayakayana hi hunehuneya, babana taniwaga atapuna mimituwa bogei amaka i wele damaneya uyahina. Po mimituwana i gelegeletai uyahina hi polopolou hi pa, 'Ega iyai gehouna a kadidili mei geka mimituwana, apo iyai ina wigawiyeya?'

<sup>5</sup> Ma mimituwana i hunehunena meya po Yaubada i palipaliguyoguyougeya. Yaubada a palihalena i tuhagaya ipa ina taniwaga wama hiya magouhi 42 naka bolima tonuga ma tupona uyahina.

<sup>6</sup> Uyahinei mimituwana Yaubada a tupo po gowana i kawaiapapoenihi po hoi yada tu mae atapuhi i kawaiapapoenihi.

7 Ma Yaubada a palihalena i tuhagaya ipa Yaubada a lawa waiwoiyawahi ina wigawiyehi po ina kadidili, yaka anani taniwaga atapuna ina taniwageya, guguni geha po guguni geha, lawa geha po lawa geha, pona geha po geha po ani taniwaga atapuhi ina taniwageya.

8 Ma tu mehikuti atapuhi uyahina apo hina polou, ma iyawoi ega uyahina hita polopolou naka tauhi Sipi Natuna a luyagohana bukana, u hinena gowahi i gilugilumihi yohola hipuli ega ita wiwawali ma i hounihi babana Sipina Natuna ubeihi i hilage.

9 Ma inapa taumi iyawoi anai tanigami baha geke ona wotagoya.

10 Apo Yaubada a nugotuhu ina pa hina panipan-  
imi  
yaka hina panimi.  
Ma kwasikwasigei hina ununimi  
yaka hina unimi.

Uyahinei taumi Yaubada a lawa waiwoiyawami ona towolo kadidili ma ona witumagana imahi.

*Mimituwa hipuli hinenei i geletai*

11 Ma mimituwa wiluwagana a gagaleya ma hipuli hinenei i geletai, donana luwaga mei sipi natuna donana, ma ponana mei mogaya ponana.

12 Ma mimituwa tahatahayana a kadidili atapuna mimituwa wouna i weleya po ipa tu mehikuti atapuhi ina taniwagehi po mimituwa tahatahayana uyahina hina polopolou naka tauna lolowa unununa i hilage ma i luyagohana meme.

13 Ma mimituwa hipuligei i gelegeletai manini kadikadidilihi gehouhi i wogeletehi po mayau

ebebalana yadei i peu hopu mai hoi hipuli po lawa matahiyei hi galeyā.

<sup>14</sup> A wipoya mimituwa tahayahayana uyahinei i nei yaka manini baneina i dewaya po tu mehipuli atapuhi i koyakoyamehi ma hi wootagoya. Ma i baha po lawa talaoloto hi gilugilumi galenana mei mimituwa tahatahayana unununa hi laihilageni kwasikwasigei ma i lauyagohana meme.

<sup>15</sup> Mimituwa wiluwagana wipoya i wiwaya ipa talaolotona yautu i wele damaneya po emoemotana ina baha. Ega yaka talaoloto a lugagayo i houni ipa apo lawa ega hina polopolou uyahina yaka hilage hina wialoni.

<sup>16</sup> Ma atapuhihi i taniwagehi muhomuhohi po balubaluhi, tu wasawasa po tu dayadayabu, babada po tu bagibagi nima hinebawahi bo ununuhi a wekiwekilala hina gilumihi.

<sup>17</sup> Ma uyahihi taniwaga witewiteina i houni po tauhi ega hai wekiwekilala, apega hina igimagimala halena po gasi hina igimagimala. Ma hai wekiwekilala naka mimituwa tahatahayana gowana po a numela.

<sup>18</sup> Anona geke e memae ma inapa iyai ina hanapugeya yaka apo mimituwana a numela ina hiyawa tuhagaya: 666 naka lawa numelana a lata.

## 14

### *Tu wiluyagohana a lawa hai lougo*

<sup>1</sup> Ma a itotolana po Sipi Natuna a galeyā, Saiyoni oyana u tepana i towotowolo ma lawa magouhi tausana 144 mitehi hi memae naka Amana ma tauna gowahi gilumana u tepahi i memae.

<sup>2</sup> Ma yadei dagugu gehouna a noonoli mei goila kolokololona ma gololonana mei palele. Po gololohi a noonolihi mei hai ani wigohagoha gita ponahi hi haki wahaga.

<sup>3</sup> Ma lawa boluhi hi towotowolo Yaubada anani tugula wasawasana u naona, ma mimituwa wohepali ma tanitaniwaga u naohi hi towotowolo ma lougo wouna hi lawilawi. Ma loughona ega iyai emoemotana po ina hanapugeya ma bolu magouhi tausana 144 tauhi tunawahi emoemotahi, tauhi tu mehipuli ma Yaubada i gimalehi po i luyawahihi.

<sup>4</sup> Geka lawahi tauhi nugonugohi wabolahi ega apapoe binei hita winene yabayababa wiwine mitehi, ma tamogi Sipi Natuna hi wotago imahiyeya apo meka ina nena tauhi mitehi. Tauhi Yaubada amaka i gimalehi lawa magomagouhi u hayahi, po tauhi ani'mbenena tahatahayana Yaubada ma Sipi Natuna ubeihi.

<sup>5</sup> Tauhi ega hita ikoyakoyama po ega kikina hai apapoe.

### *Tu winoyanoya tonuga hai tuwega*

<sup>6</sup> Tu winoyanoya gehouna a gagaleya ma yada uyahina i lupa po i tuwetuwega noya memewahagana i ipaliweleneya tu mehipuli ataputa uyahita naka ani taniwaga po guguni, po pona, po bolu emosi po emosi uyahita.

<sup>7</sup> Tu winoyanoyana ponana i lata ma i ibaabani i pa, 'Yaubada ona matuteya ma ona wotalagiyeya, babana a houga luhetala amaka i geleta. Tauna yada ma hipuli po gasi boga ma goila Tu wiwawal-  
ihi u matana ona polou po ona wotalagae.'

<sup>8</sup> Ma tu winoyanoya wiluwagana i wotagoya po i ototu i pa, ‘Babiloni dobu baneina amaka i peu, amaka i peu, babana a wine uyahinei ani taniwaga magomagouhi i wiumahi po hi badebade. Wine naka matamaga dewahi apapoehi.’

<sup>9</sup> Tu winoyanoya witonugana mulihiyei i nenei i otu i pa, ‘Iyawoi mimituwa tahatahayana he wootalagiyeya ma a talaoloto uyahina he polopolou po a wekiwekilala u nimahi po u tepahi, hi wiwaya

<sup>10</sup> tauhi Yaubada a wine kadikadidilina apo hina umaya, ma winena naka Yaubada a uyogigai dumana amaka i hiwogi uyogigai keyakana uyahina. Ma mayau waipoyana po gaima waipoyana lawa apo mayana hina waya, Yaubada a tu winoyanoya waiwoiyawahi po Sipi Natuna u matahi.

<sup>11</sup> Ma mayouna bogahuna e gegae ega sigasigana po ega anani kokoe. Yaka tauhi mimituwa tahatahayana ma a talaoloto uyahihi he polopolou po gowana wekiwekilalana hi wiwaya, hai wiyuwa ega sigasigana iyeta po ididibala uyahihi.’

<sup>12</sup> Geka binei ma ipa Yaubada a lawa waiwoiyawahi hin’omtaibagibagi po tauhi a taniwaga hina wiponawogogeya ma Yesu hina wotago imahiyeya.

<sup>13</sup> Ega yaka baha yadei a noonoli ma i pa, ‘Geka una gilumi inapa iyawoi tauhi Guyau tu wotago imahiyena hina hilage apo hina kaoha.’

Ma Alugo Woiyawa i baha i pa, ‘Baha dumana hina wiyagohina, hai upuhegoya mihana apo hina tuhagaya.’

### *Hipuli mahulana*

<sup>14</sup> A itotolana po yaloi wakewakekena a galeyaleya ma yaloina u tepana mei Lawa Moinana ina tugutugula ma a gagaleyaleya, a unuhau gole unubolina i houni ma u nimana kwasikwasi komkomna.

<sup>15</sup> Ma tu winoyanoya gehouna yada numa dalabunei i hopu mai po lawa yaloi u tepana i memae i otu labatana uyahina i pa, 'Om kwasikwasigei un'omboliboli babana houga yaba houkana amaka i geleta, hipuli mahulana amaka i nonogo.'

<sup>16</sup> Ega yaka lawana yaloi u tepana i memae a kwasikwasi i taleya po hipuli mahulana i lugogoni.

<sup>17</sup> Ega yaka tu winoyanoya gehouna yada numa dalabuna uyahinei i hopuhopu mai tauna kwasikwasi komkomna u nimana.

<sup>18</sup> Ma tu winoyanoya gehouna ani talaguyaba uyahinei i nenei, tauna ani talaguyaba mayouna tu galena itetena ponana i lata ma i baha nae tu winoyanoyana a nima kwasikwasina uyahina i pa, 'Om kwasikwasigei wine ugohi hoi hipuli una lugogoni babana amaka hi gou duma.'

<sup>19</sup> Ega yaka tu winoyanoyana a kwasikwasigei wine ugohi hoi hipuli i lugogoni po pihaga baneina u hinena i wihulu hopunehi. Pihagana naka Yaubada a uyogigai.

<sup>20</sup> Po wine ugohi atapuhi i lumutumutuhi pihaga u hinena naka dobu baneina u uputana, ma tala i kolokololo pihaga uyahinei mei goila ina hopu po a bala daona kilomita handele tonuga ma a gae guli emosi.

# 15

## *Manini sigasigana*

<sup>1</sup> Wekiwekilala gehouna hoi yaka a gagaleya i lata lagona duma po ani nugogohola baneina. Tu winoyanoya magouhi 7 hai wiyuwa apa-poehi magouhi 7 naka wiyuwa sigasigana. Naka wiyuwahi Yaubada a uyogigai sigasigana.

<sup>2</sup> Ma boga dumolana a gagaleya galenana mei hilo tamogi ebala mitehi i wilaya. Ma bogana u liyaliyana bolu hi towotowolo, tauhi mimituwa tahatahayana a talaoloto mitehi hi igawiya po hi kadidili yaka a wekiwekilala ega hita waya. Uyahinei naka boluhihi hai gita Yaubada u nimahi i hounihi,

<sup>3</sup> po Mose lilina hi lawilawi tauna Yaubada a tu bagibagi ma Sipi Natuna lilina hi lawilawi hi pa, 'Guyau Yaubada tu kadidili dumam,

Om bagibagi hi geduma po ani nugogohola ma om ani nae tahaya dumadumaluna po de-wadewana  
ani taniwaga atapuhi tam hai wasawasa.

<sup>4</sup> Guyau ee, lawa atapuhi hina matutem

ma gowam hina wotalagiyeya,  
babana tunawam u wiwoiyawa  
yaka ani taniwaga atapuhi apo hina nei u matam  
hina polou,  
matababana lawa magomagouhi om bag-  
ibagi dumadumaluhi amaka hi galehi.'

<sup>5</sup> Geka u mulina a itotolana ma hoi yada numa dalabu u hinena gudu i gunahoeya, naka babanoyana Yaubada anani mae dumana.

<sup>6</sup> Ma numa dalabuna uyahinei tu winoyanoya magouhi 7 hi gelegeletai, wiyuwa magouhi 7 u



nimahi. Tu winoyanoyahi hai luilui woyeuyeuhi ma namanamalihi, nugonugohi panipanihi, naka gole.

<sup>7</sup> Ega yaka mimituwahi lauyagohanahi wohep-alihi emosi uyahihiyei keyaka gole magouhi 7 i winihi po i welehi, ma keyakahi u hinehi Yaubada Memewahagana a uyogigai i lihogohi.

<sup>8</sup> Naka hougana numa dalabu gahu i pani po Yaubada a manini po a namala binei, ega iyai emoemotana po ipa numa dalabuna uyahina ina lui a sigana tu winoyanoya magouhi 7 hai wiyuwa magouhi 7 hina wokokowi.

## 16

### *Yaubada a uyogigai keyakana*

<sup>1</sup> Ma numa dalabuna u hinena pona gololona baneina gehouna a noonoli ma i ibaabani tu winoyanoya magouhi 7 uyahihi i pa, 'Ona hopu hoi hipuli po Yaubada a uyogigai keyakahi magouhi 7 ona hiwogihhi.'

<sup>2</sup> Ega yaka tu winoyanoya tahatahayana i hopu mai hoi hipuli po a keyaka i hiwogi po paga apapoe dumana po waiyuwana i geleta. Tauhi mimituwa wekiwekilalana hi waya po mimituwa a talaoloto uyahina hi polopolou naka tauhi paga hi tuhagaya.

<sup>3</sup> Ma tu winoyanoya wiluwagana a keyaka i waya po hoi boga i hiwogi po boga i witala po mei lawa hilahilagena talana. Uyahinei ginouli magomagouhi hoi boga hi memae atapuhi hi hilage pahihi.

4 Ma tu winoyanoya witonugana a keyaka i waya po goila kolokololohi po huuhulahi uyahihi i hiwogihhi po hi witala.

5 Ega yaka tu winoyanoya goila i gagalena iteteya ponana a noonoli ma i pa,  
'Yaubada ee, tam houga odubona po houga geke uyahihi e memae  
ma u dumalu po u wiwoiyawa.

Geka om luhetalana i dumalu

6 babana lawa apapoehi Yaubada om lawa waiwoiyawahi  
po om tu bahapiko hi uniunihi ma talahi hi laikololohi.

Uyahinei hai meiha amaka u welehi  
po apo tala hina umaya yaka naka wimihana i linana dumahi.'

7 Ma pona gololona baneina gehouna a noonoli ani talaguyaba uyahinei i pa,  
'Guyau Yaubada tu kadidili dumam  
om luhetala geke i dumalu po i dewadewa дума.'

8 Ma tu winoyanoya wiwohepalina a keyaka i waya po kabudala uyahina i hiwogi, po kabudala a kadidili i luwitani po emoemotana ma lawa atapuhi i yagulihi.

9 Ma wipoya baneina lawa atapuhi i yaguyagulihi ma Yaubada gowana hi kawakawaiapa-poeya babana ipa tauna a taniwaga uyahinei ma wiyuwa baneina ita geleta. Ma tamogi ega hita nugobui po Yaubada hita wotalagiyeya.

10 Ma tu winoyanoya winimitutuna a keyaka i hiwogi mimituwa tahatahayana anu ani tugula po

anani taniwaga atapuna i uguwi. Ma lawa a taniwaga hi wootagoya wiyuwa baneina hi wialoni po hi yamhanakidiyana.

<sup>11</sup> Ma Yaubada hoi yada i memae hi kawakawa-iapapoeya pagahi wiyuwahi ubeihi. Ma ega kiki-ina hita nugobui hai apapoe uyahihiei.

<sup>12</sup> Ma tu winoyanoya wisikisina a keyaka i hiwogi goila baneina gowana Yupiliti uyahina po goilana atapuna i hayahaya, po uyahinei tu wasawasa gehouhi tupo kaluwabugei hi damanai.

<sup>13</sup> Ma alugo apapoehi tonuga galenahi mei hakeke a gagalehi ma hi gelegeletai mogaya kayakayana gamonei ma mimituwa tahatahayana gamonei ma a tu bahapiko koyakoyama gamonei.

<sup>14</sup> Alugo tonuga naka Tomodulele a manini wekiwekilalana hi dewadewahi, ma hi nae po tu wasawasa hipuli tupo wohepali uyahihi hai bolu hi weluwelugogonihi mai gawiya binei, Yaubada Tu Kadidili dumana a iyeta baneina uyahina.

<sup>15</sup> ‘Ona nonola imahi babana u houga nei apo mei tu danene hai nei, ma taumi inapa iyai ina itotolana imahi yaka a lului ina galena iteteya po ega ina ihinimaya a kowakowa binei ma ina kaoha.’

<sup>16</sup> Ega yaka tu wasawasa boluhi hi lugogona nae tupo gehouna uyahina mi Hibulu hi pa, ‘Amagedana.’

<sup>17</sup> Ma tu winoyanoya wisebenina a keyaka i waya po yada u tipolina i hiwogi ma numa dalabu u hinena Yaubada anani mae wasawasa uyahinei pona baneina gehouna i gelegeletai i pa, ‘Amaka i kokoe.’

<sup>18</sup> Naka hotana ma namanamala po palepale po gololo gehouhi ma guhuguu baneina i geleta. Odubona po amalai lawa hai houga uyahina ega meka guhuguu baneina gehouna ita geleta.

<sup>19</sup> Ega yaka dobu baneina gowana Babiloni i boli tonugeya po tupo tonuga hi geleta, po tupo atapuhi uyahihi hai dobu i wiapapoenihi. Ma Yaubada Babiloni baneina a apapoe i nugonugotuhuya po a keyaka uyahinei wine i wiumaya, ma wine naka a uyogigai dumana winena.

<sup>20</sup> Ma oya po bonabona atapuhi hi yababa po ega emoemotana ta tuhaga mehi.

<sup>21</sup> Ma gadiwewe wobibitutuna mei gaima yadei i holuholu hopu mai lawa uyahihi, emosi po emosi a witai mei neula baeki tupona. Uyahinei lawahi Yaubada hi kawakawaiapapoeya gadiwewe apapoe dumana binei, babana wiyuwa baneina hi tuhagaya.

## 17

### *Tu matamaga dumana*

<sup>1</sup> Tu winoyanoya magouhi 7 Yaubada hai keyaka i welehi, ma uyahihiyei gehouna i nei po i paliweleya i pa, 'Una nei po tu matamaga wawinena a meiha a wiatatiyem. Tu matamaga wawinena anona naka dobu baneina boga u tepana e tugutugula.

<sup>2</sup> Ma hipuli wasawasahi matamaga uyahina hi kadidili po tu mehipuli atapuhi tu matamagana gugouna nugohi i waya ma hi umumaya po hi badebadegeya.'

<sup>3</sup> Ma Alugo Woiyawa a kamna mayana a wiwaya po tu winoyanoyana i niyeu hoi balabala yabayababa ma wawinena a gagaleya mimituwa kayakayana i geluya, ma mimituwana hinina atapuna uyahina paliguyaguyau hi gilumihi ma unununa magouhi 7 ma donana magouhi 10.

<sup>4</sup> Ma wawinena a lului kayana mei tu wasawasa hai luiului, ma a wihiya gole ma gaima namanamalihi ma giniuba matahi ma nimanei keyaka gole i wogowogoya nugogobu i lihogoya matamaga dagihana uyahinei.

<sup>5</sup> Ma u tepana gowa gowagowadana hi laukidi hi pa,

BABILONI BANEINA,  
TU MATAMAGA PO TU NUGOGOBU  
HOI HIPULI HINAHI

<sup>6</sup> Ma wawinena a gagaleya Yaubada a lawa waiwoiyawahi po Yesu tu limoinena talahi amaka i umaya po i badebade.

Ma a nugogohola duma wawinena ani galenana binei.

<sup>7</sup> Ega yaka tu winoyanoyana i baha mai uyahiu i pa, 'Ega una gohogoholim, babana apo uyahim a liyayahi wawinena anona awai, ma mimituwa unununa magouhi 7 ma donana magouhi 10 anona awai.

<sup>8</sup> Mimituwana e gagaleya naka lolowa a yautuna i memae ma amaka i hilage ma yohola apo domo daodaona hinenei ina geletai po ina nena po hina wiapapoe dumaya. Ma lawa iyawoi tauhi tu mehipuli lolowa gowahi Yaubada ega ita gilugilumihi yautu bukana u hinena hougana hipuli i iwawali uyahina, tauhi apo yohola mimituwana

hina gagaleya po hina nugogohola a towolo meme binei.

<sup>9</sup> ‘Apo nugonugom ina lumadi yaka una hana-pugehi ununu magouhi 7 naka oya magouhi 7, ma oyahi uyahihi naka wawinena anani tugula, ma anona gehouna wasawasa magouhi 7.

<sup>10</sup> Ma wasawasahi uyahihiyei nimitutu amaka hi peu ma emosi hota e tanitaniwaga ma gehouna apo yohola ina geletai po houga kuku hotana ina taniwaga.

<sup>11</sup> Wasawasa magouhi 7 hai taniwaga apo hina kokoe, ma wasawasa emosi hai boluna uyahinei naka mimituwana lolowa i yauyautu ma i hilage apo yohola ina nei po tu wasawasahi hai maga ina luwitani ma tamogi ina nae po hilage apo ina tuhagaya.

<sup>12</sup> ‘Ma dona magouhi 10 u gagalehi naka wasawasa magouhi 10 tauhi ega hita taniwaga, apo yohola houga kuku hotana hina taniwaga mimituwana mitehi.

<sup>13</sup> Tauhi hi winugoemota po ipa hai nugotuhu po hai kadidili po hai taniwaga hina palihalehi mimituwana uyahina.

<sup>14</sup> Po apo Sipi Natuna mitehi hina witona tamogi Sipi Natuna apo ina kadidili lagonihi babana tauna tu wiguyau hai Guyau po tu wiwasawasa hai Wasawasa, uyahinei tauhi i otugehi po i winaganihi po tu wotago imahiyena Sipi Natuna mitehi apo hina kadidili lagonihi.’

<sup>15</sup> Ega yaka tu winoyanoyana i baha mai uyahiu i pa, ‘Boga u gagalehi uyahihi tu matamaga wawinena i tugutugula anona naka lawa mago-magouhi, bolu geha po bolu geha, po ani taniwaga

geha po ani taniwaga geha, po pona emosi po emosi.

<sup>16</sup> Ma mimituwana donana magouhi 10 u gagalehi tauhi apo tu matamaga wawinena hina wihinigigiyea po hina wiapapoe dumaya po a kowakowana ina memae, ma uyogona hin'ani pahi po geyamina hoi mayau hina apuya.

<sup>17</sup> Hai wigawiya anona naka Yaubada u nugonugohi amaka i wohouni po a nugotuhu hina dewa emoteya yaka hai kadidili po hai bagabagi mimituwana hi weleya po tauna ina tanitaniwaga a sigana Yaubada a baha ina limoineya.

<sup>18</sup> Ma wawinena u gagaleya naka dobu baneina e tanitaniwageya wasawasa atpuhi uyahihi hoi hipuli.'

## 18

### *Babiloni a peu*

<sup>1</sup> Geka u mulina tu winoyanoya gehouna a gagaleya ma yadei i hopuhopu mai tauna a taniwaga i lata duma po namalana hipuli atapuna i tunu yayahi.

<sup>2</sup> Ponana i lata ma i otu i pa,  
 'Hei, Babiloni dobu baneina amaka i peu,  
 amaka i peu,  
 po apo mimituwa apapoehi po alugo  
 palopaloumahi po kiu apapoehi po  
 gobugobuhi apo hina widobugeya,

<sup>3</sup> babana Babilonina a wine uyahinei  
 tupo atapuhi lawahi i wiumahi po hi bade-  
 bade.

Wine naka matamaga dewahi apapoehi,

- uyahinei hipuli wasawasahi mitehi hi eneno  
 gwau  
 po hini luhogalana uyahinei hi wiwasawasa  
 po tu uneune gapola baneina hi tutuhagaya.’
- <sup>4</sup> Hoi yada pona gehouna a noonoli ma i pa,  
 U lawa, dobu naka ona hopu haleya, inapa ona  
 memae  
 yaka apo a apapoe ina damanahi uyahimi  
 po a meiha wiyuwa ona tuhagaya.
- <sup>5</sup> Matababana a apapoe i lata duma po a gae mei  
 oya,  
 a dewahi apapoe ubeihi  
 ma Yaubada i nugonugotuhu po ipa ina wim-  
 iheya.
- <sup>6</sup> Una imiheya a apapoe a lata naka pitenana  
 po mala luwaga maiha una weleya,  
 yaka a keyaka apapoena mihana mala  
 luwaga una weleya.
- <sup>7</sup> Tauna i hunena meya i pa,  
 “Tau wawine wasawasa,  
 ma ega tau hiwape po ipa a tutou.”  
 Uyahinei gapola i wasawasagehi ma i yamgaganu.  
 Mihana una weleya po wiyuwa ina  
 tutougeya.
- <sup>8</sup> Uyahinei mala emosi hota apo witai ina tuha-  
 gahi:  
 hilahilage ma witutou ma gomala,  
 ma mayau ebalana ina liyababahi.  
 Babana Guyau Yaubada tauna Tu Kadidili du-  
 mana  
 tauna apo geke wawinena a meiha ina we-  
 leya.
- <sup>9</sup> ‘Ma hipuli wasawasahi tauhi wawinena  
 mitehi hi matamatamaga ma hi igapola tauhi



dobuna binei apo hina tou babana hougana apo ina alalahi ma bogahuna ina gegae ma hina gagaleya.

<sup>10</sup> Ma apo hina matouta duma a wiyuwa binei po uheiya hina towolo ma hina laudalili hina pa, “Aee, aee, kihoni, Babiloni dobu baneina ma kadikadidilina mala emosi libahibahi u tuhagaya.”

<sup>11</sup> ‘Tu uneune hoi hipuli apo hina nugodubu duma dobuna binei po hina tou, matababana ega iyai gehouna emoemotana po hai gapola ina gimalehi.

<sup>12</sup> Hai gapola naka gole, po siluba po gaima namanamalihi po giniuba matahi po kaleko gegehi po luilui namanamalihi po mayau dimudimumuhi po dona baneihi po gawi po kopa po pawasi po gaima wakewakekehi,

<sup>13</sup> po naiya po dadi dimudimumuhi, gasi dadi ani apuna binei po wakatu po gohogoho po wine po bunama po pegapega po bulumakau po sipi po hosi po womtiteina po tu bagibagi hinihi po alugohi gimagimalahi.

<sup>14</sup> ‘Ega yaka tu uneune hi baha nae dobuna uyahina hi pa, “Ginouli dewadewahi u lauhogalehi amaka hi kokoe mei gasi om wasawasa wigiyana atapuhi amaka hi yababa po apega una tuhaga mehi.”

<sup>15</sup> Ma tu uneunehi tauhi naka gapola baneina hi tutuhagaya dobuna uyahinei, uheiya hi towotowolo babana dobuna a wiyuwa hi gagaleya po hi matouta duma po anai nugowiyuwahi ma hi tutou,

<sup>16</sup> hi pa,

“Aee, aee, kihoni, dobu noka tupo baneina  
lolowa a wihiya gole kaleko gegehi po lului  
wakewakekehi po kayakayahi,  
ma gaima namanamalihi po giniuba matahi  
uyahina,

<sup>17</sup> mala emosi hota ma a wasawasa atapuhi amaka  
hi yababa.”

‘Ma tauhi wam tanitaniwagahi po tu gelugelu  
po tu bagibagi po tu uneune atapuhi uheiya hi  
towolo,

<sup>18</sup> ma dobuna i alalahi bogahuna hi galeyama  
hi laudalili hi pa, “Odubona ega dobu baneina  
gehouna mei noka dobuna ma geke hougana iy-  
owai?”

<sup>19</sup> Ega yaka tauhi tepahi hi gibahi ma hi tou  
labatana hi pa,

“Aee, Aee, kihoni, noka dobu baneina  
uyahinei tu kadakadau hai gapola hi tutuha-  
gahi  
mala emosi hota ma a wasawasa atapuna i  
yababa.

<sup>20</sup> Ona kaoha labatana taumi Yaubada a lawa hoi  
yada,  
po a tu wiwoiyawona po a tu wituwetuwega  
po a tu bahapiko ona kaoha labatana,  
babana omi ani wiyuwa dobuna Yaubada a meiha  
amaka i weleya.” ’

<sup>21</sup> Ega yaka tu winoyanoya kadikadidilina  
gaima banei dumana i wohepaya po i halena  
hopuneya hoi boga ma i baha i pa,  
‘Babiloni dobu baneina apo ina peu duma  
po mei geke gaimana apega hina galena  
meya.

22 Uyahinei dobuna a kaoha apo ina kokoe  
 po apega iyai gehouna ina lauinainaga  
 bo ina igita bo himogo ina huwehuweni,  
 po nima bagibagina tu hanahanapugehi apega  
 hina memae,  
 ma ulo gololona ina kokoe.

23 Lampa yayatahi apega hina gelegeleta,  
 po tu witawine ponahi apega hina nonoli dobuna  
 uyahina.

Matababana dobuna tu uneunehi hipuli atapuna  
 hi gelagonihi  
 babana hai balau uyahinei tu mehipuli ata-  
 puhi hi koyamehi.

24 Ma Yaubada a tu bahapiko po a lawa wai-  
 woiyawahi po lawa gehouhi  
 talahi a kololo hi tutuhagaya dobuna  
 uyahina.'

## 19

<sup>1</sup> Geka u mulina ma hoi yada gololo banei du-  
 mana gehouna a noonoli mei lawa bolu banei  
 dumana ponaponahi ma hi ibaabani hi pa,  
 'Haleluya, Yaubada ta wotalagiyeya  
 tauna tu wiluyagohanita po tu kadikadidili du-  
 mana.

<sup>2</sup> Babana a luhetala i dewadewa po apapoe  
 mihana i lidumaluya  
 po tu matamaga dumana wawinena a matamaga  
 uyahinei hipuli atapuna i iapapoeya  
 mihana amaka i weleya.

Ma dobuna uyahina Yaubada a tu bagibagi talahi  
 hi laikolohi  
 mihana i wiapapoeya.'

<sup>3</sup> Ma mala luwaga hi otu labatana hi pa,  
 ‘Haleluya, Yaubada ta wotalagiyeya  
 babana dobu baneina e alalahi  
 ma bogahuna houga magomagouna e gegae.’

<sup>4</sup> Ega yaka tanitaniwagahi magouhi 24 ma mim-  
 ituwa magouhi wohepali, hi polou hopu Yaubada  
 anani mae wasawasa u matana hi wotalagae hi  
 pa,  
 ‘Moina, Haleluya, to wotalagiyem.’

*Sipi Natuna a tawine tolehana*

<sup>5</sup> Ega yaka ani mae wasawasa uyahinei baha  
 gehouna i nenei i pa,  
 ‘Taumi ata Yaubada a tu bagibagi  
 po tu matutena muhomuhomi  
 po balubalumi ona wotalagiyana duma.’

<sup>6</sup> Ma apoma gololo banei dumana gehouna a  
 noonoli mei lawa bolu banei duma ma mei gule-  
 tutu gololona ma mei palele gololona baneina ma  
 hi ibaabani hi pa,  
 Haleluya,

Babana Guyau Yaubada tu kadidili dumam e  
 tanitaniwaga.

<sup>7</sup> To gwauyala ma to kaoha labatana  
 po to wotalagiyem  
 babana Sipi Natuna a tawine tolehana i geleta  
 yaka agona amaka i wihiya tawine binei.

<sup>8</sup> Agona a kaleko gegehi,  
 yeuyeuhi po wakewakekehi Yaubada i we-  
 leya.’

(Ma luiluina naka Yaubada tu wiwoiyawena hai  
 dewa dumadumaluhi.)

<sup>9</sup> Ega yaka tu winoyanoya uyahiu i baha mai i  
 pa, ‘Baha geke una gilumi,’ po a gilumi, ‘Taumi

iyawoi Yaubada i ototugemi Sipi Natuna a tawine tolehana uyahina apo ona kaoha.’ Ma tu winoy-anoyana uyahiu i baha meme i pa, ‘Geka Yaubada a baha dumana.’

<sup>10</sup> Ega yaka a guli hopu tu winoyanoyana u aena po a polopolou ma uyahiu i baha mai i pa, ‘Ega naka pite, tau Yesu a tu bagibagi mei tam, po mei walewalehimi tauhi Yesu gowana tu kawamoinena. Tamogi Yaubada uyahina una polopolou babana Yesu tu kawamoinena tauhi galenahi mei tu bahapiko.’

### *Hosi wakewakekena tu geluna*

<sup>11</sup> Yada a gagaleyā ma i gunahoeya ma hosi wakewakekena i memae po tu geluna hi wigowaya hi pa, ‘Tu limoina po Tu lidumalu.’ Uyahinei taniwaga dumadumaluhi uyahihiyei e imeiha ma e igawiya.

<sup>12</sup> Ma tu geluna matana galenana mei mayau alalatana ma unununa unuhau gegehi boluhi he memae. Ma gowana hi gilugilumi ega emoemotana iyai ina hanapugeya. Tauna tunawana i hanapugena meya.

<sup>13</sup> Ma a lului i ototeni tala i wihogoya ma gowana hi baheya hi pa, ‘Yaubada a Baha.’

<sup>14</sup> Ma tu wigawiya mi yadēna hai hosi wakewakekehi hi geluhi ma hi wootagoya, hai kaleko gegehi, yeuyeuhi po wakewakekehi.

<sup>15</sup> Ma gamonei kwasikwasi komkomna i gelegeleta apo uyahinei ani taniwaga hoi hipuli ina taniwaga lagonihi po a kodila pawasigei ina taniwagehi po gasi wine ani’mpihagana uyahinei

ina lumutumutuhi, naka Yaubada Tu kadidili a houga uyogigai baneina.

<sup>16</sup> Ma a luilui po aena hi gilugilumihi hi pa,  
 TU WIWASAWASA HAI WASAWASA  
 PO TU WIGUYAU HAI GUYAU

<sup>17</sup> Tu winoyanoya gehouna a gagaleya ma kabudala uyahina i towotowolo po i otu labatana kiu lupalupahi atapuhi uyahihi i pa, 'Ona liya mai Yaubada a toleha baneina uyahina,

<sup>18</sup> po on'am wasawasa uyogohi po gawiya kapekapehahi uyogohi po tu wigawiya uyogohi po hosi uyogohi po tu gelugeluhi uyogohi po lawa magomagouhi uyogohi po babada uyogohi po hai tu bagibagi uyogohi po lawa muhomuhohi po balubaluhi uyogohi.'

<sup>19</sup> Ega yaka mimituwa bogei i gelegeletai ma hipuli wasawasahi hai tu wigawiya mitehi hi'mboina gogona ma ipa hina witona tauna hosi wakewakekena i gelugeluya a tu wigawiya mitehi.

<sup>20</sup> Po ega yaka Yaubada mimituwana a tu bahapiko koyakoyama mitehi i womomohihi po a yautuhi ma i wihulu hopunehi domo waipoya dumana galenana mei baya u hinena. Tu bahapiko waikoyakoyamana tauna lolowa a manini i ibagibagi mimituwana u matana po uyahinei lawa i koyamehi po tauhi mimituwana a wekiwekilala uyahihi i memae ma a talaoloto uyahina hi polopolou. <sup>21</sup> Ma kwasikwasi komkomna hosi tu geluna gamonei i hopuhopu uyahina mimituwana a bolu unihi po hi hilage, ega yaka kiu hi nei po uyogo hi'mam po koibahi hi hogohi.

## 20

### *Bolima magouhi tausana*

<sup>1</sup> Tu winoyanoya gehouna a gagaleya ma yadei i hopuhopu mai domo daodaona ani'mhoena ma gulawa banei dumana u nimana ma i nei

<sup>2</sup> po mogaya kayakayana i womomohi ma i panipani naka bolima magouhi tausana binei naka tauna mota odubo walihagana gowana Setani bo Tomodulele.

<sup>3</sup> Tu winoyanoya mogayana i halena hopuneya domo daodaona u hinena ma i gudu tomgeya po ega lawa ina koyakoyamehi a siga bolima magouhi tausana hina kokoe. Apoma hina lupena haleya houga kuku hotana.

<sup>4</sup> Ma lawa alugohi hai ani mae wasawasahi a gagalehi ma Yaubada hai taniwaga i welehi po hi tugula po ipa hina luhetala. Geka tauhi lawahi odubona Yaubada ma Natuna Yesu Keliso hai baha tu wibaabaniyehi gadouhi hi boliboli halehi. Tauhi ega mimituwa bo a talaoloto uyahina hita polopolou ma ega a wekiwekilala u tepahi bo u nimahi hita gilumihi. Geka tauhi apo hina luyagohana meme po Keliso mitehi hina tanitaniwaga bolima magouhi tausana u hinehi.

<sup>5</sup> Naka tauhi tu towolo tahatahayahi ma tu hihilage gehouhi tauhi bolima magouhi tausana hina kokoe ma apoma hina luyagohana meme.

<sup>6</sup> Tauhi tu towolo tahatahayahi apo hina kawaidewedeweni po hina wiwoiyaweni, yaka hilage wiluwagana apega ina taniwagehi ma tamogi tauhi Yaubada ma Keliso hai tu witalaguyaba po apo Keliso mitehi hina tanitaniwaga bolima magouhi tausana.

<sup>7</sup> Bolima magouhi tausana hina kokoe ma Tomodulele apo panina hina lupena haleya po ina hopu

<sup>8</sup> po ina nae hipuli tupo wohepali uyahihi po ina koyamehi. Naka tuponana Goga ma Megoga uyahihi, po Tomodulelena ina boina gogonohi gawiya binei ma hai maga apega a hiyawa pahi mei niha bubuna.

<sup>9</sup> Uyahinei ma hipuli atapuna hi lugogoni po Yaubada a dobu baneina i lauhogaleya naka tu wiwoiyawena hai ani mae hi mewiwilehi ma mayau ebebalana yadei i hopu mai po atapuhahi i ala pahihi.

<sup>10</sup> Ega yaka Yaubada Tomodulele waikoyakoyamana i waya po i halena hopuneya domo waipoya dumana galenana mei baya u hinena. Lolowa mimituwa ma a tu bahapiko koyakoyama mitehi hi hahalena hopunehi uyahina iyeta po uguwa wiyuwa ma tou ega sigasigana.

### *Luhetala sigasigana*

<sup>11</sup> Ani mae wasawasa baneina ma wakewakekena tu duhunena a galeya, ma u matana yada ma hipuli amaka hi yababa po ega emoemotana ta galena mehi.

<sup>12</sup> Ma tu hilahilage atapuhi a gagalehi balubaluhi po muhomuhohi, ani mae wasawasa u naona hi towotowolo ma buka hi lagahi. Ma buka gehouna hi lagahi tauna yautu bukana, po tu hilahilage i lauhetalehi bukahi u hinehi hai dewa i gilugilumihi uyahihiyei.

<sup>13</sup> Tauhi boga uyahina hi eneno hi nei ma hiyoyowa tu enogena po hipuli tu hilahilagehi atapuhi



hi liya mai ma yamoha po yamoha a dewa uyahi-hiyei i wimihehi

<sup>14</sup> po tu hilahilage i wihulu hopunehi domo waipoya dumana u hinena, naka hilage wiluwagana.

<sup>15</sup> Ma apo iyawoi ega gowahi ina tuhagahi yautu bukana u hinena yaka apo ina halena hopunehi domo waipoya dumana u hinena.

## 21

### *Yada wouna ma hipuli wouna*

<sup>1</sup> Yada ma hipuli gapolahi odubohi a gagalehi ma hi lugowadehi po hi yababa ma yada wouna ma hipuli wouna hi lugeletehi ma ega boga.

<sup>2</sup> Ma dobu waiwoiyawana a gagaleya naka Yelusalem wouna i hopuhopu mai yadei ma Yaubada a wihiya galenana mei wawine tawine binei ma e ihiya ipa agona mitehi hina witu-tuhaga.

<sup>3</sup> Ma ani mae wasawasa uyahina pona gololona baneina a noonoli ma i pa, 'Hei, Yaubada a lawa mitehi apo hina megogona po tauhi a lawa po tauna mitehi.

<sup>4</sup> Tauna mata diligwegwehi i hamaga halehi po apega hilage po wiyuwa po tou uyahihi ina geleta babana memae odubona amaka i kokoe duma.'

<sup>5</sup> Ega yaka ani mae wasawasa tu miyena i baha i pa, 'Ginouli magomagouhi amaka a liwounihi,' ma i baha meme uyahiu i pa, 'Geka bahahi una gilumihi babana baha dumahi po dumadumaluhi.'

<sup>6</sup> Ma i baha meme i pa, 'Ee, amaka i kokoe. Tau ani wawala po ani kokoe ma tau tu tahaya po tu wimuli.' Ma iyawoi tauhi uyopopohi hina

haleehi yaka luyagohana goilana e huhuleya a wele yababahi yautuhi binei.

<sup>7</sup>Ma apo taumi iyawoi ona kadikili yaka geke ginoulihi dewadewahi a wele damanehi uyahihi po ona kawaiyaubadeu ma taumi a kawainatunemi.

<sup>8</sup>‘Ma lawa iyawoi ega hita itumaganeu nugonugolehihi po nugonugogobuhi tauhi tu’munugo po tu matamaga po tu balabalau po palouma tu witumaganehi po tu wikoyakoyama, naka tauhi hai dobu waipoya dumana galenana mei baya naka hilage wiluwagana uyahina e memae.’

### *Yelusalem wouna*

<sup>9</sup>Ega yaka tu winoyanoya magouhi 7 wiyuwa sigasigana keyakana magouhi 7 hi wiwinihi emosi i nei po i paliweleu i pa, ‘Una nei po Sipi Natuna a heliyam a wiatatiyem, ma apo ina lawagi po agona.’

<sup>10</sup>Ega yaka Alugo Woiyawa i weluwiniu po oya baneina u tepa dumana ma Dobu Waiwoiyawana i iatatiyeu gowana Yelusalem yadei e hopuhopu mai Yaubada uyahinei.

<sup>11</sup>Ma Yaubada a didiga yayatana dobuna uyahina i namanamali, po dobuna namalana mei gaima woyeuyeuna i lugiigila imahiyena dumaya.

<sup>12</sup>Ma dobuna galina i lata duma po i dao duma, ma matetana magouhi 12 ma matetahi uyahihi Isalaela gugunina magouhi 12 gowahi hi gilumihi mateta emosi po emosi uyahihi ma matetahi tu galena itetehi naka tu winoyanoya magouhi 12.

<sup>13</sup>Ma galina tupo wohepali uyahihiyei, ma mateta magouhi tonuga tupo emosi po emosi

uyahihi he memae; hoi tupo kaluwabu mateta tonuga, ma hoi tupo bauli mateta tonuga, ma hoi tupo yawana mateta tonuga, ma hoi tupo yalasi mateta tonuga.

<sup>14</sup> Galina hi wogowogoya naka gali baneina, ma anani towolo gaima dewadewahi ma kadikadidil-ihi magouhi 12 u tepahi, ma gaimahi uyahihi Sipi Natuna a tu wituwetuwega magouhi 12 gowahi hi gilumihi.

<sup>15</sup> Ma tu winoyanoyana mitehi to ibaabani u ni-mana ani'mluwa gole, uyahinei dobuna po mate-tahi po galina ina luwahi.

<sup>16</sup> Dobuna a dao po a yawata tupo wohep-ali emoemotana. Ega yaka tu winoyanoyana a luwagei dobuna i luwaluwaya a dao po a gae po a yawata naka kilomita magouhi tausana luwaga.

<sup>17</sup> Ma galina yawegana nimanei i luwaluwaya naka guli magouna 36 mei tauta lawa ta yamluwa pite.

<sup>18</sup> Galina gaima dewadewahi po namanamalihi uyahihiyei hi dewaya, ma dobuna gole uyahinei hi dewaya po i lugiigila dumaya.

<sup>19</sup> Dobuna anani towolo gaimahi hi laukidihi gaima namanamalihi galenahi tapuhi po tapuhi uyahihiyei. Ani towolohi emosi po emosi uyahina gaima emosi ani galenana uyahinei hi lukidi:

Gaima galenana mei yada

Gaima galenana mei kahi giniuba

Gaima galenana mei kiu duhelele

Gaima galenana mei modao belana

<sup>20</sup> Gaima galenana mei hiyai

Gaima galenana mei haba

Gaima galenana mei tuwoya goilana

Gaima galenana mei tawali wiidaidagana.

Gaima waimagomagololona

Gaima waihulehulelena

Gaima woyawoyawana

Gaima woyawoyawana ma namanamalina.

<sup>21</sup> Ma dobuna guduhi giniuba matahi baneihi magouhi 12 uyahihyeyi hi dewahi mateta emosi po emosi uyahina. Ma dobuna tahayana gole yawa po i lugigila dumaya.

<sup>22</sup> Dobuna uyahina ega numa dalabu ata galeya, babana Guyau Yaubada Tu kadidili dumana po Sipi Natuna tauhi hi winuma dalabu.

<sup>23</sup> Dobuna ega a luhogala ipa kabudala po wamahiya hina laalani, babana Yaubada a didiga atapuna e namanamali po gasi Sipi Natuna tauna dobuna yayatana.

<sup>24</sup> Ma tupo atapuhi lawahi yayatanei apo hina nena, ma hipuli wasawasahi hai gapola apo hina neihini mai dobuna uyahina.

<sup>25</sup> Ma dobuna ega hita guduguduya babana iyeta tunawana ma ega uguwa.

<sup>26</sup> Ma tupo atapuhi lawahi hai gapola wasawasahi po hai dewa wotalagaehi apo hina neihini mai dobuna u hinena.

<sup>27</sup> Ma ginouli gobugobuhi dobuna uyahina apega hina lui, tu bagibagi apapoehi po tu wikoyakoyama apega hina lui. Ma iyawoi nawa amaka gowahi hi gilugilumihi Sipi Natuna a buka waiyautuna u hinena, tauhi apo hina lui.

## 22

*Luyagohana Goilana*

<sup>1</sup> Ega yaka tu winoyanoyana yautu goilana i wiatatiyeu, goilana i lugiigila imahiyena dumaya, Yaubada ma Sipi Natuna hai ani mae wasawasa uyahinei e kolokololo hopu mai.

<sup>2</sup> Ma ani kololona dobuna tahayana tipolinei e kolokololo hopu. Ma goilana u liyaliyana yautu mayouhi he towotowolo. Mayouhi wama hiya emosi po emosi uyahihi ugohi tapuhi po tapuhi, ma bolima emosi u hinena mala 12 he ugugo, ma luguluguhi hipuli wouna tu miyena hai mula-mula.

<sup>3</sup> Dewa awai Yaubada i palipaligubahi apega hina lui gae dobuna uyahina. Yaubada ma Sipi Natuna hai ani mae wasawasa uyahina hina memae ma Sipi Natuna a tu bagibagi uyahina hina wootalagae.

<sup>4</sup> Tepana apo hina galey a ma gowana u tepahi ina memae.

<sup>5</sup> Apega uguwa yaka lampa po kabudala yayatahi apega hina luhogalehi, babana Guyau Yaubada tauna hai yayata po mitehi hina itaniwaga ega sigasigana.

<sup>6</sup> Ega yaka tu winoyanoyana uyahiu i baha i pa, 'Baha atapuhi u noonolihi naka baha dumahi po dumadumaluhi, babana Guyau Yaubada a tu bahapiko Alugonei i iatatiyehi naka pitenana geke hougana a tu winoyanoya i himiliyai po ipa a tu bagibagi uyahimi to wiatatiyana kikina ma apo awai hina gelegetai ubeihi.'

### *Yesu a hopu mai*

<sup>7</sup> Ma Yesu i baha i pa, 'Hei, houg a kikina ma apo a hopu mahi uyahimi po taumi iyawoi bahapiko

geka bukana u hinena o wootago imahi ona kaoha labatana.’

<sup>8</sup> Tau Yoni, geka ginoulihi atapuhi a nonolihi po a galehi. Geka ginoulihi hi kokoe ma tu winoyanoyana u aena a guli hopu tauna geka ginoulihi i wiatatiyeu yaka uyahina a polou.

<sup>9</sup> Ega yaka tauna uyahiu i baha mai i pa, ‘Ega uyahiu una polopolou, tau tu bagibagi hota mei tam po walewalehim tu bahapiko po tauhi buka geka tu wiponawogogena Yaubada uyahina ta polopolou.’

<sup>10</sup> Tu winoyanoyana uyahiu i baha meme i pa, ‘Geka bahapikohi bukana u hinena ega una gowagowadihi babana houga amaka i tulabelabeni.

<sup>11</sup> Tauhi tu apapoe amaka ma uyahihi apapoe ina mewahaga, po tauhi hai dewa gobugobuhi uyahihi gobu ina mewahaga. Ma tauhi tu dewadewa uyahihi dewadewa ina mewahaga ma tauhi tu wiwoiyawa uyahihi woiyawa ina mewehaga.’

<sup>12</sup> Ega yaka Yesu i baha i pa, ‘Kikina ma apo a nehi, po lawa atapuhi hai meiha a gutaya omi bagibagi hai lata naka pitenana,

<sup>13</sup> babana tau ani wawala po ani kokoe ma tau tu tahaya po tu wimuli.

<sup>14</sup> ‘Ma ona kaoha labatana apo taumi iyawoi omi luilui amaka o laiyeuyeuhi ipa taumi omi taniwaga ona nonoli apo luyagohana mayouna ugonona oni po dobuna matetanei ona lui.

<sup>15</sup> Ma dobuna uputana tu miyena galenahi mei kedewa, naka lawa hai dewa gobugobuhi po balabalauhi po tu matamaga po tu munugo

po palouma tu witumaganehi po koyama tu luhogalena.

<sup>16</sup> ‘Tau Yesu ma u tu winoyanoya a himilihi uyahimi po geke ani limoinahi hi paliwelemi tu witumagana bolumi uyahimi. Tau Dawita gugunina uyahinei a nei po tau mei ubona malatomtom yayatana baneina.’

<sup>17</sup> Ega yaka Alugo Woiyawa ma tu tawine wawinena hi baha hi pa, ‘Yesu, una nei,’ po apo taumi iyawoi baha geke ona nonoli yaka apo ona pa, ‘Yesu una nei.’ Ma taumi iyawoi uyopopomi hi halehaleehi ona nei, ma iyawoi nugonugomi ipa luyagohana goilana ona wiyababaya po on’umaya yaka on’umaya po ona luyagohana.

*Ani kokoe*

<sup>18</sup> Taumi bahapiko bukana tu nonolina ona galena itete memi meka po apo buka geke u hinena baha gehouhi ona luwitanihi babana apo Yaubada omi wiyuwa buka geke u hinena i bahebaheya ina luwitanihi.

<sup>19</sup> Ma ega buka geke u hinena baha gehouna ona wiwihaleya babana apo Yaubada omi guta mayouna lauyagohanana uyahinei ina wihaleya, po omi ani mae dobu waiwoiyawana u hinena geke bukana i bahebaheya uyahimiyei apo ina wihaleya.

<sup>20</sup> Geke babana tu limoinena i pa, ‘Moina, kikina ma apo a nehi.’

Moina Yesu, una nei. Tam Guyau.

<sup>21</sup> Yesu Guyau a lunugotootogo magomagoumi ina melabenimi. Moina.

**YAUBADA A WOGATALA WOUNA**  
**The New Testament in the Tawala language of Papua**  
**New Guinea**  
**Nupela Testamen long tokples Tawala long Niugini**

copyright © 1985, 2014 Wycliffe Bible Translators, Inc. and Bible Society of Papua New Guinea

Language: Tawala

Translation by: Wycliffe Bible Translators

Text © 1985, 2014 Wycliffe Bible Translators, Inc.; 2014 print edition © Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 28 Dec 2024 from source files dated 31 Aug 2023

03dd8e7f-64f4-5464-abd5-5e08202f0f29